

四庫全書

子部

欽定四庫全書

子部

類經卷二十

詳校官太醫院司醫_臣袁天錫

編修_臣倉聖脈覆勘

總校官知縣_臣楊懋珩

校對官中書_臣范來宗

謄錄監生_臣李璜

欽定四庫全書

類經卷二十

明 張介賓 撰

鍼刺類

五變五輸刺應五時

靈樞順氣一日分為四時篇○十七

黃帝曰余聞刺有五變以主五輸願聞其數岐伯曰人有五藏五藏有五變五變有五輸故五五二十五輸以應五時黃帝曰願聞五變岐伯曰肝為牡藏其色青其時春其音角其味酸其日甲乙

肝屬木為陰中之少陽故曰牡藏

心為

牡藏其色赤其時夏其日丙丁其音徵其味苦

心屬火為陽中

之大陽故曰牡藏

脾為牝藏其色黃其時長夏其日戊己其音

宮其味甘

脾屬土為陰中之至陰故曰牝藏

肺為牝藏其色白其音商

其時秋其日庚辛其味辛

肺屬金為陽中之少陰故曰牝藏

腎為牝藏

其色黑其時冬其日壬癸其音羽其味鹹是為五變

屬腎

水為陰中之太陰故曰牝藏。按五藏配合五行而惟肝心為牡藏脾肺腎皆為牝藏蓋木火為陽土金水皆

為陰也

黃帝曰以主五輸奈何

此言五輸之主五時也。本節缺岐伯曰三字

藏

主冬冬刺井

五藏主藏其氣應冬井之氣深亦應乎冬故凡病之在藏者當取各經之井穴也

色主春春刺榮

五色蕃華其氣應春榮穴氣微亦應乎春故凡病見於色者當取各經之榮也

時主夏夏刺輸

五時長養其氣應夏輸穴氣盛亦應乎夏故凡病之時作時止者當取各經之

輸也音主長夏長夏刺經

五音繁盛氣應長夏經穴正盛亦應長夏故凡病在聲音者當

取各經之經也味主秋秋刺合

五味成熟以養五藏其氣應秋合穴氣斂亦應乎秋故凡經滿

而血者病在胃及因飲食內傷者當取各經之合也○按本篇五時之刺以應五輸謂冬刺井春刺榮夏刺輸

長夏刺經秋刺合者以井應冬榮應春輸應夏經應長夏合應秋也如本輸四時氣水熱穴等論所載皆同不

可易者考之六十五難曰井者東方春合者北方冬也七十四難曰經言春刺井夏刺榮季夏刺俞秋刺經冬

刺合皆與本經不合必難經之是謂五變以主五輸變誤也當以本經為正不可不辨

各應五輸是謂

黃帝曰諸原安合以致六輸

五藏五輸之外六府

尚有原穴是為六輸故問其所合之義

岐伯曰原獨不應五時以經合之

以應其數故六六三十六輸

上文止言五藏五輸以應五時而不及六府之原者

蓋原合於經不復應時如長夏之刺經則原在其中應其數矣是即六府之六輸也○按本輸篇所載六府之

原在九鍼十二原篇即謂之腧故六十六難曰以腧為原也後世鍼灸諸書宗之皆言陽經之腧即為原故治

腧即所以治原陰經之腧并於原故治原即所以治腧今此節云以經合之以應其數然則經原腧三穴相隣

經亦可以代原矣詳義見經絡類十黃帝曰何謂藏主

五十六章及圖翼四卷十二原解中冬時主夏音主長夏味主秋色主春願聞其故岐伯曰

病在藏者取之井病變於色者取之榮病時間時甚者
取之輸病變於音者取之經經滿而血者病在胃及以
飲食不節得病者取之於合故命曰味主合是謂五病
也

此申明上文之
義也注如前

四時之刺 十八

春取絡脉諸榮大經分肉之間甚者深取之間者淺取
之靈樞本輸篇○此下言經絡淺深兼諸輸而分主四
時也絡脉者十二經之大絡如手太陽列缺之類是
也諸榮者十二經之榮穴如手太陰魚際之類是也絡
淺榮微皆應春氣春以少陽之令將升未升其氣在中

故刺之者在絡在榮皆中取於大經
分肉之間因其間甚而可深可淺也
夏取諸腧孫絡肌

肉皮膚之上

之諸腧者十二經之腧穴如手太陰經太淵
之類是也絡之小者為孫絡皆應夏氣夏

以老陽之令陽盛於外故宜淺刺
於諸腧孫絡及肌肉皮膚之上也
秋取諸合餘如春法

諸合者十二經之合穴如手太陽尺澤之類是也諸合
應秋故宜取之秋以少陰之令將降未降氣亦在中故

餘如春法謂亦宜中取於大
經分肉之間而可淺可深也
冬取諸井諸腧之分欲深

而留之

也諸井者十二經之井穴如手太陰少商之類是
也諸腧者藏府之腧如肺腧心腧之類是也非

上文五腧之謂諸井諸藏皆主冬氣冬以老陰之
令陽氣伏藏故宜取井腧欲其深而久留之也
此四

時之序氣之所處病之所舍藏之所宜

處上聲謂氣
之所居也

○黃帝問於岐伯曰夫四時之氣各不同形百病之起

皆有所生灸刺之道何者為定

靈樞四時氣篇
○定一本作實

岐伯荅

曰四時之氣各有所在灸刺之道得氣穴為定

時氣所
在即氣

也故春取經血脉分肉之間甚者深刺之間者淺刺之

春取經即前篇大經分肉之間
也甚者深間者淺義俱如前

夏取盛經孫絡取分間

絕皮膚

盛經孫絡
皆陽分也

秋取經腧邪在府取之合冬取井榮

必深以留之

邪在府謂秋陰未盛陽邪猶
在陽分也本篇詳義見下文

○帝曰春取絡脉分肉何也

素問水熱穴論○本論
之義即所以釋前篇也

岐

伯曰春者木始治肝氣始生肝氣急其風疾經脉常深

其氣少不能深入故取絡脉分肉間

春屬木木應肝肝主風春刺絡者刺

肝邪也風木之邪雖為急疾然春氣本柔將達於外經脉常深邪非深入故當取絡脉之穴如前篇及分肉間

也

○帝曰夏取盛經分腠何也岐伯曰夏者火始治心

氣始長脉瘦氣弱陽氣流溢熱熏分腠內至於經故取

盛經分腠絕膚而病去者邪居淺也

夏屬火火應心主熱夏令陽浮於

外熱熏分腠氣在盛經孫絡之間故夏取盛經分腠者治在陽分所以去心邪也

所謂盛經者

陽脉也

謂手足三陽及十二經之經穴如手太陰經渠之類凡夏氣所在者即陽脉也

○帝曰

秋取經俞何也岐伯曰秋者金始治肺將收殺金將勝

火陽氣在合陰氣初勝濕氣及體

經俞者諸經之經穴俞穴也俞應夏經應

長夏皆陽分之穴秋屬金金應肺令主收殺其時金將勝火陽氣尚在諸經之合陽氣初衰陰氣初勝故寒濕

之氣及體陰氣未盛未能深入故取俞以寫陰邪取合以虛

陽邪陽氣始衰故取於合

陰氣未深猶在陽分故取經俞以寫陰邪陽氣始衰邪將

收斂故取合穴以虛陽邪也皇甫士安云是謂始秋之治變

○帝曰冬取井榮何也

岐伯曰冬者水始治腎方閉陽氣衰少陰氣堅盛巨陽

伏沉陽脉乃去

井應冬榮應春也冬屬水水主腎水王於冬其氣閉藏也少陰腎也巨陽膀胱

也二經表裏陰氣方盛所以陽脉衰去故取井以下陰逆取榮以實陽氣

取井以下陰逆抑有餘也故曰冬取井榮春不亂取此

之謂也皇甫士安云是為初冬之治變○軌音求

○春取絡脉夏取分腠秋取氣口冬取經輸靈樞寒熱病篇○春

夏之取與前四時氣篇水熱穴論皆同秋取氣口者手太陰肺脉應秋金也冬取經輸者經穴通藏氣藏主冬

也凡此四時各以時為齊齊義見下文絡脉治皮膚分腠治

肌肉氣口治筋脉經輸治骨髓絡脉浮淺故治皮膚分腠有理故治肌肉氣口

者脉之大會故治筋脉經輸連藏故治骨髓○按此言經輸者總言經穴也非上文經俞之謂蓋彼以五輸言

故云秋取經俞冬取井榮此以內外言故云絡脉治皮膚經輸治骨髓也當解其意

○春氣在毛夏氣在皮膚秋氣在分肉冬氣在筋骨

靈樞

終始篇○此言病氣之中人隨時氣而為深淺也○按四時刺逆從論曰春氣在經脉夏氣在孫絡長夏氣在肌肉秋氣在皮膚冬氣在骨髓中與本篇若異者何也蓋本篇言病邪之應時令有表有裏四時刺逆從論言人氣之合天地有升有降義刺此病者各以其時為齊本不同非矛盾也詳見下章齊劑同藥曰藥劑鍼曰砭劑也春夏陽氣在上故取毫毛皮膚則淺其鍼秋冬陽氣在下故取分肉筋骨則深其鍼是以故刺肥人者以秋冬之齊刺瘦人者以春夏時為齊也

之齊

此又於四時之中而言肥瘦之異也肥人肉厚淺之則不及故宜秋冬之齊瘦人肉薄深之則太過

故宜春夏之齊也

刺分四時逆則為害

十九

黃帝問曰診要何如

素問診要經終篇

岐伯對曰正月二月天

氣始方地氣始發人氣在肝

方謂氣方升也歲方首也人事方興也發萬物發生

也肝屬木氣應春故人氣在肝

三月四月天氣正方地氣定發人氣在

脾

正方謂時氣正升歲事正新也定發專於發生也此時天地之氣自下而升土居升降之中而脾應之故

人氣在脾五月六月天氣盛地氣高人氣在頭

盛夏陽升之極故人氣應

之在頭

七月八月陰氣始殺人氣在肺

氣升則物生氣降則物死此時天氣

漸降清秋當令陰氣始殺萬物人氣
自頭而降肺金應之故人氣在肺
九月十月陰氣始

冰地氣始閉人氣在心

自秋入冬陰氣始凝心氣始
閉陽氣在中故人氣在心十

一月十二月冰復地氣合人氣在腎

復言其重寒凝之
甚也斯時陽氣深

伏於下故
人氣在腎

○故春刺散俞及與分理血出而止甚者傳

氣間者環也

按四時刺逆從論曰春氣在經脉此散俞
者即諸經之散穴也義如下文分理肌肉

分理也春宜疏達故欲血出而止傳布散也環周也病
甚者鍼宜久留故必待其傳氣病稍間者但候其氣行

一周於身約二
刻許可止鍼也

夏刺絡俞見血而止盡氣閉環痛病必

下絡俞謂諸經浮絡之穴以夏氣在孫絡也夏宜宣泄
故必見血而止盡氣盡去其邪血邪氣也閉環謂去

鍼閉穴須氣行一周之頃也凡有痛病必退下矣

秋刺皮膚循理上下同法神

變而止

循理循分肉之理也上言手經下言足經刺皆同法秋氣在皮膚邪猶未深故但察其神氣變

易異於未刺之前可止鍼矣

冬刺俞竅於分理甚者直下間者散下

孔穴之深者曰竅冬氣在骨髓中故當深取俞竅於分理間也甚者直下察邪所在而直取其深處也間者散下或左右上下散布其鍼而稍宜緩也

春夏秋冬各有所刺法其所在

上

十二月言氣之升降此四季言氣之深淺故各有所刺法其所在

○春刺夏分脉亂氣

微入淫骨髓病不能愈令人不嗜食又且少氣

此下言四時之

誤刺也春刺孫絡是春刺夏分也夏應心心主脉故脉亂氣微腎水受氣於夏腎主骨故入淫於骨髓心火微

則胃主失其所養故不嗜食不嗜食故少氣也春刺秋分筋攣逆氣環為欬嗽

病不愈令人時驚又且哭

春刺皮膚是刺秋分也肝木受氣於秋肝主筋故筋攣也

逆氣者肝氣上逆也環周也秋應肺故氣周及肺為欬嗽也肝主驚故時驚肺主悲憂故又且哭

春刺

冬分邪氣著藏令人脹病不愈又且欲言語

春刺骨髓是春刺冬

分也冬應腎腎傷則邪氣內侵而著藏故令人脹火受氣於冬心屬火而主言故且欲言語也

夏刺春

分病不愈令人解慄

夏刺經俞是夏刺春分也肝應春其主筋傷其肝氣故令人筋力解

慄夏刺秋分病不愈令人心欲無言惕惕如人將捕

之夏刺秋分傷其肺也肺氣不足故令人欲無言惕惕如人將捕之者恐也恐為腎之志肺金受傷病及其

子故亦虛而恐也

夏刺冬分病不愈令人少氣時欲怒

夏傷其腎則精

虛不能化氣故令人少氣水虧則木失所養而肝氣強急故時欲怒也

秋刺春分病不已

令人惕然欲有所為起而忘之

秋刺春分傷肝氣也心失其母則神有不足故

令人惕然也

秋刺夏分病不已令人益嗜臥又且善寢

秋

夏分則心氣少而脾氣孤脾虛則倦而嗜臥心虛則神不安而善夢

秋刺冬分病不已令

人洒洒時寒

秋刺冬分誤傷腎陰則精氣耗散故令人洒洒寒慄也

冬刺春分病

不已令人欲臥不能眠眠而有見

肝藏魂肝氣受傷則神魂散亂故令人欲

卧不能眠或眠而有見謂怪異等物也

冬刺夏分病不愈氣上發為諸痺

心應夏其主血脉脉傷則邪冬刺秋分病不已令人善

渴

刺傷肺金必虧腎水故令人善渴

○凡刺胃腹者必避五藏

此下言刺害也

五藏傷則五神去神去則死矣故凡刺胃腹者必避五藏中心者環死中脾者五日

死中腎者七日死中肺者五日死

環周一日也此節止言四藏獨不及肝必

脫簡耳按刺禁論所言五藏死期尤為詳悉但與本節稍有不同見本類後六十四中鬲者皆為

傷中其病雖愈不過一歲必死

鬲膜前齊鳩尾後齊十一椎心肺居於鬲上肝

腎居於鬲下脾居在下近於鬲間鬲者所以鬲清濁分上下而限五藏也五藏之氣分主四季若傷其鬲則藏氣陰陽相亂是為傷中故不出一年死刺避五藏者知逆從也所謂從者

高與脾腎之處不知者反之

高連胃脇四周脾居於中腎著於脊知而避之者為

從不知者為逆是謂反也

○刺胃腹者必以布幪著之乃從單布上

刺

此下言刺法也胃腹虛淺近藏故必以布幪著之而後刺所以護心腹慎風寒也○幪音皎布也著音灼

被服也

刺之不愈復刺

以平為期也

刺鍼必肅

敬謹毋忽也

刺腫搖

鍼

搖大其竅寫之速也

經刺勿搖

恐泄其氣也

此刺之道也

○是故春氣在經脉夏氣在孫絡長夏氣在肌肉秋氣

在皮膚冬氣在骨髓中

素問四時刺逆從論

帝曰余願聞其故岐

伯曰春者天氣始開地氣始泄凍解冰釋水行經通故

人氣在脉

春時天地氣動水泉流行故人氣亦在經脉

夏者經滿氣溢入孫

絡受血皮膚充實

夏時氣盛故溢入孫絡而充皮膚所以人氣在孫絡

長夏者經

絡皆盛內溢肌中

六月建未是為長夏土勝之時經絡皆盛所以人氣在肌肉中

秋者

天氣始收腠理閉塞皮膚引急

秋氣始收腠理始閉所以人氣在皮膚

冬

者蓋藏血氣在中內著骨髓通於五藏

冬氣伏藏內通五藏所以人氣

在骨髓中

是故邪氣者常隨四時之氣血而入客也至其變

化不可為度然必從其經氣辟除其邪除其邪則亂氣

不生

時氣遷變病必隨之察病氣從經氣以辟除其邪邪去氣調故不致生亂矣

○帝曰逆

四時而生亂氣奈何

此下言刺逆四時也

岐伯曰春刺絡脉血氣

外溢令人少氣

此春刺夏分也夏氣未至先奪於外故令血氣外溢而少氣血

春刺肌

肉血氣環逆令人上氣

此春刺長夏也春時木王二氣本虛復刺肌肉重傷脾元血氣

環周皆逆不相運行故為喘滿上氣○按本篇與前診要經終論者義同文異但彼分四時此分五時故有刺肌肉之謂然本篇春夏冬三時皆闕刺秋分皮膚等義意者以長夏近秋故取肌肉即所以刺秋分也後放此

春刺筋骨血氣內著令人腹脹

此春刺冬分也春氣發越而復深取筋骨以傷

其陰故血氣內著令人腹脹

夏刺經脉血氣乃竭令人解休

悞刺經脉所以

血氣內竭解休者形跡困倦莫可名之之謂○休音跡

夏刺肌肉血氣內却令人

善恐

長夏未至而先奪其氣所以血氣却弱故令人善恐

夏刺筋骨血氣上逆令

人善怒

夏刺冬分則陰虛於內陽勝於外故令人血氣逆而善怒

秋刺經脉血氣上

逆令人善忘

心主脉悞刺經脉則心氣虛故令人善忘

秋刺絡脉氣不衛外

令人卧不欲動

秋時收斂氣已去絡而復刺之則氣虛不能衛外氣屬陽陽虛故臥不欲動

秋刺筋骨血氣內散令人寒慄

秋氣未至筋骨而深刺之則血氣內散而中氣

虛所以寒慄

冬刺經脉血氣皆脫令人目不明

諸脉者皆屬於目冬刺經

脉預奪之也故令人血氣脫而目不明

冬刺絡脉內氣外泄留為大痺

當陽

氣伏藏之時而刺其陽分則陽氣外泄陽虛陰勝故留為大痺

冬刺肌肉陽氣竭絕令

人善忘

冬時刺其夏之氣故陽氣竭絕陽氣者精則養神陽虛則神衰所以善忘

凡此四時

刺者大逆之病不可不從也反之則生亂氣相淫病焉

刺失四時是為大逆此時氣之不可不從也若反而為之必生亂氣故相淫為病

凡刺不知四

時之經病之所生以從為逆正氣內亂與精相薄必審

九候正氣不亂精氣不轉

薄邪正相迫也九候各有其部必審明病之所在從而刺

之庶正氣不亂精氣不致轉變矣

○帝曰善刺五藏中心一日死其動

為噫中肝五日死其動為語中肺三日死其動為欬中

腎六日死其動為噦欠中脾十日死其動為吞

此節義與刺禁

論同但多一欠字詳見木類後六十四

刺傷人五藏必死其動則依其藏

之所變候知其死也

動變動也見其變動之候則識其傷在某藏故可知其死期

肥瘦嬰壯逆順之刺

靈樞逆順肥瘦篇全○二十

黃帝問於岐伯曰余聞鍼道於夫子衆多畢悉矣夫子之道應若失而據未有堅然者也夫子之問學熟乎將

審察於物而心生之乎

應若失而據未有堅然者言隨應而解若無堅據之難破者也

岐伯曰聖人之為道者上合於天下合於地中合於人事必有明法以起度數法式檢押乃後可傳焉故匠人

不能釋尺寸而意短長廢繩墨而起平水也工人不能

置規而為圓去矩而為方知用此者固自然之物易用

之教逆順之常也

檢押規則也有法有則以防其錯亂乃可傳於後世焉物之平者莫過於

水故曰平水此言聖人之道合於三才工匠之巧成於規矩固皆出於自然之理知自然之妙者是謂易用之教逆順之常也黃帝曰願聞自然奈何岐伯曰臨深決水不用

功力而水可竭也循掘決衝而經可通也此言氣之滑

澁血之清濁行之逆順也

水有通塞氣有滑濇血有清濁行有逆順決水通經皆因

其勢而利導之耳宜通宜塞必順其宜是得自然之道也

黃帝曰願聞人之白黑肥

瘦小長各有數乎

人之形質不同
刺法亦有異也

岐伯曰年質壯大血

氣充盈膚革堅固因加以邪刺此者深而留之此肥人

也

年大者氣血正盛故
與肥壯之人同其法

廣肩腋項肉薄厚皮而黑色脣

臨臨然其血黑以濁其氣滯以遲其為人也貪於取與

刺此者深而留之多益其數也

臨臨下垂貌脣厚質濁
之謂多益其數即久留

也黃帝曰刺瘦人奈何岐伯曰瘦人者皮薄色少肉廉

廉然薄脣輕言其血清氣滑易脫於氣易損於血刺此

者淺而疾之

廉薄也薄脣輕言肉瘦氣少也若此者刺
不宜過恐其脫損氣血故必淺入其鍼而

連去之也

黃帝曰刺常人奈何岐伯曰視其白黑各為調之

其端正敦厚者其血氣和調刺此者無失常數也

常人者不

瘦不肥之人也視其白黑者白色多清宜同瘦人黑色多濁宜同肥人而調其數也其端正敦厚者是即常人之度當調以常數經水篇曰足陽明刺深六分留十呼足太陽深五分留七呼足少陽深四分留五呼足太陰深三分留四呼足少陰深二分留三呼足厥陰深一分留二呼手之陰陽其受氣之道近其氣之來疾其刺深者皆無過二分其留皆無過一呼其少長大小肥瘦以心揀之此即常數之謂而用當酌其宜也

黃帝

曰刺壯士真骨者奈何岐伯曰刺壯士真骨堅肉緩節

監監然此人重則氣瀦血濁刺此者深而留之多益其

數勁則氣滑血清刺此者淺而疾之

壯士之骨多堅剛故曰真骨監監堅

固貌壯士之辨有二若堅肉緩節不好動而安重者必氣濡血濁此宜深刺久留同肥人之數也若勁急易發者必氣滑血清此宜淺刺疾去之同瘦人之數也黃帝曰刺嬰兒奈何岐伯曰

嬰兒者其肉脆血少氣弱刺此者以毫鍼淺刺而疾發

鍼日再可也

嬰兒血少氣弱故但宜毫鍼以淺而速若邪有未盡寧日加再刺不可深而久也

黃帝曰臨深決水奈何岐伯曰血清氣濁疾寫之則氣

竭焉

濁當作滑血清氣滑者猶臨深決水泄之最易宜從緩治可也若疾寫之必致真氣皆竭矣

黃

帝曰循掘決衝奈何岐伯曰血濁氣濡疾寫之則經可

通也

血濁氣滯者猶循掘決衝必藉人力但疾寫之其經可通也

黃帝曰脉行之逆

順奈何岐伯曰手之三陰從藏走手手之三陽從手走

頭足之三陽從頭走足足之三陰從足走腹

手之三陰從藏走手

者太陰肺經從藏出中府而走大指之少商少陰心經從藏出極泉而走小指之少衝厥陰心主經從藏出天池而走中指之中衝也○手之三陽從手走頭者陽明大腸經從次指商陽而走頭之迎香太陽小腸經從小指少澤而走頭之聽宮少陽三焦經從名指關衝而走頭之絲竹空也○足之三陽從頭走足者太陽膀胱經從頭之睛明而走足小指之至陰陽明胃經從頭之承泣而走足次指之厲兌少陽膽經從頭之瞳子膠而走足四指之竅陰也○足之三陰從足走腹者太陰脾經從大指隱白走腹而上於大包少陰腎經從足心湧泉

走腹而上於俞府厥陰肝經從足大指大敦而走腹之期門也○凡手之三陰自藏走手為順自手而藏則逆手之三陽自手走頭為順自頭而手則逆足之三陰自足走腹為順自腹而足則逆足之三陽自頭走足為順自足而頭則逆此經之所以有逆順

黃帝曰少陰之脉獨下行何也

足之三陰從足走腹皆自下而上獨少陰之脉若有下行者乃衝脉也詳如下文

岐伯曰不然夫

衝脉者五藏六府之海也五藏六府皆稟焉其上者出於

頄頄滲諸陽濯諸精

衝脉起於胞中為十二經精血之海故五藏六府皆稟焉其上行者輸在

於大抒足太陽經也故出其下者注少陰之大絡出於氣於頄頄主滲濯諸陽之精

街循陰股內廉入臍中伏行胛骨內下至內踝之後屬而

別其下者並於少陰之經滲三陰

其下行者並少陰之大絡出陽明之氣街由股

入足至內踝之後屬其別而下者自少陰以滲及肝脾二經是為三陰此其所以下行也○肝音幹脛骨也

其前者伏行出跗屬下循跗入大指間滲諸絡而溫肌

肉

跗屬足掌屬也滲諸絡而溫肌肉動輸篇作注諸絡以溫足脛○上三節與動輸篇大同詳經絡類十三

故別絡結則跗上不動不動則厥厥則寒矣

二衝脉為十

故能溫肌肉溫足脛皆衝脉之氣也若衝脉之絡因邪而結則跗上之經不動而為厥為寒者亦衝脉之所致

也黃帝曰何以明之岐伯曰以言導之切而驗之其非

必動然後乃可明逆順之行也

何以明者起人因厥而疑畏也故必先導以言

次切其脉其有素所必動而今則非者如衝陽太谿太
衝等脉當動不動乃可知其不動者為逆動者為順而
其厥逆微甚
可以明矣
黃帝曰窘乎哉聖人之為道也明於日月

微於毫釐其非夫子孰能道之也

血絡之刺其應有異

靈樞血絡論
全○二十一

黃帝曰願聞其奇邪而不在經者岐伯曰血絡是也

奇邪

即繆刺論所謂奇病也在絡
不在經行無常處故曰奇邪

黃帝曰刺血絡而仆者何

也血出而射者何也血少黑而濁者何也血出清而半
為汁者何也發鍼而腫者何也血出若多若少而面色

蒼蒼者何也發鍼而面色不變而煩悵者何也多出血

而不動搖者何也願聞其故

悵母本切悶亂也

岐伯曰脉氣盛

而血虛者刺之則脫氣脫氣則仆

氣雖盛而血則虛者若寫其氣則陰陽俱

脫故為仆倒

血氣俱盛而陰氣多者其血滑刺之則射

血出而能

射者陰中之氣使之也故曰血氣俱盛

陽氣畜積久留而不寫者其血黑

以濁故不能射

陽氣久留不寫則陽邪日盛陰血日枯故血黑以濁所出不多不能射也

新

飲而液滲於絡而未合和於血也故血出而汁別焉

新飲

入胃未及變化而滲於絡故血汁相半

其不新飲者身中有水久則為腫

陰氣積於陽其氣因於絡故刺之血未出而氣先行故

腫

水在肌表而因於絡陰氣積於陽分也刺之血未出而氣先行陰滯於陽而不易散也所以為腫

陽之氣其新相得而未和合因而寫之則陰陽俱脫表

裏相離故脫色而蒼蒼然

新相得而未和合者言血氣初調營衛甫定也當此之時

根本未固而妄施以寫則陰陽表裏俱致脫離而衰危之色故見於面也刺之血出多色不

變而煩惋者刺絡而虛經虛經之屬於陰者陰脫故煩

惋

取血者刺其絡也若出血過多必虛及於經經之屬陰者主藏藏虛則陰脫故為煩惋陰陽相

得而合為痺者此為內溢於經外注於絡如是者陰陽

俱有餘雖多出血而弗能虛也

陰陽相得言表裏之邪相合也經絡之病俱有

餘雖多出血皆邪氣耳故弗能虛

黃帝曰相之奈何岐伯曰血脉者盛

堅橫以赤上下無常處小者如鍼大者如筋則而寫之

萬全也故無失數矣失數而反各如其度

相視也視其血絡盛而且

堅及橫以赤者或上或下或小或大者皆當因其微甚則而寫之寫有則度故可萬全無失於刺絡之術數矣若失其數而反其法則為仆為脫為虛為腫等證各如刺度以相應也

黃帝曰鍼入而肉

著者何也岐伯曰熱氣因於鍼則鍼熱熱則肉著於鍼

故堅焉

肉著者吸著於鍼也鍼入而熱肉必附之故緊瀯難轉而堅不可拔也

行鍼血氣六不同

靈樞行鍼篇
全〇二十二

黃帝問於岐伯曰余聞九鍼於夫子而行之於百姓百姓之血氣各不同形或神動而氣先鍼行或氣與鍼相逢或鍼已出氣獨行或數刺乃知或發鍼而氣逆或數刺病益劇凡此六者各不同形願聞其方

言受鍼之人有此六者之

異岐伯曰重陽之人其神易動其氣易往也黃帝曰何謂重陽之人岐伯曰重陽之人焇焇高高言語善疾舉足善高心肺之藏氣有餘陽氣滑盛而揚故神動而氣

先行

重陽之人陽勝者也。煇煇明盛貌。高高不屈之謂心。肺為二陽之藏。陽氣滑盛而揚。故神易於動。氣

先鍼而行也。○煇郝

梏二音又呼木切。

黃帝曰：重陽之人而神不先行者

何也？岐伯曰：此人頗有陰者也。黃帝曰：何以知其頗有

陰也？岐伯曰：多陽者多喜，多陰者多怒。數怒者易解，故

曰：頗有陰，其陰陽之離合難，故其神不能先行也。

光明

陽之德也。沉滯抑鬱陰之性也。故多陽則多喜，多陰則多怒。然數怒者頗有陰也。易解者本乎陽也。陽中有陰未免陽為陰累，故其離合難而神不能先行也。黃帝曰：其氣與鍼相逢，奈何？岐

伯曰：陰陽和調而血氣淖澤滑利，故鍼入而氣出，疾而

相逢也

相逢者鍼入氣即至言其應之速也○淖乃到切

黃帝曰鍼已出而氣

獨行者何氣使然岐伯曰其陰氣多而陽氣少陰氣沉

而陽氣浮者內藏故鍼已出氣乃隨其後故獨行也

陰性

遲緩其氣內藏故陰多於陽者其鍼已出氣乃隨後而獨行也黃帝曰數刺乃知何氣

使然岐伯曰此人之多陰而少陽其氣沉而氣往難故

數刺乃知也

此亦陰滯故氣往為難往至也較之上節則此為更甚耳

黃帝曰鍼入

而氣逆者何氣使然岐伯曰其氣逆與其數刺病益甚者非陰陽之氣浮沉之勢也此皆麤之所敗工之所失

其形氣無過焉

逆從弗失何至氣逆補寫得宜何以病
益甚凡若此者乃醫之所敗所失非陰

陽表裏形
氣之過也

持鍼縱舍屈折少陰無俞

靈樞邪客篇
○二十三

黃帝問於岐伯曰余願聞持鍼之數內鍼之理縱舍之
意扞皮開腠理奈何脉之屈折出入之處焉至而出焉
至而止焉至而徐焉至而疾焉至而入六府之輸於身
者余願盡聞少叙別離之處離而入陰別而入陽此何
道而從行願盡聞其方岐伯曰帝之所問鍼道畢矣黃

帝曰願卒聞之

出止徐疾入即五輸之義別離之處言經絡之支別離合也○捍音旱

岐

伯曰手太陰之脉出於大指之端內屈循白肉際至本

節之後太淵留以澹外屈上於本節之下內屈與陰諸

絡會於魚際數脉并注其氣滑利伏行壅骨之下外屈

出於寸口而行上至於肘內廉入於大筋之下內屈上

行臑陰入腋下內屈走肺此順行逆數之屈折也

此下二節

皆言五輸之屈折也大指之端少商井也內屈循白肉際至本節之後太淵腧也凡人身經脉陰陽以紮白肉際為界紮者在外屬陽分白者在內屬陰分大聚皆然澹水搖貌脉至太淵而動故曰留以澹也從此外屈上

於本節之下內屈與諸陰絡會於魚際榮也諸陰皆會於此故數脉并注其氣滑利伏行掌後高骨之下外屈出寸口而行經渠經也上至肘內廉入於大筋之下尺澤合也乃由此內屈膈陰入腋走肺然肺經之脉從臑藏走手為順此則從手數至心主之脉出於中指之端內藏故為順行逆數之屈折

屈循中指內廉以上留於掌中伏行兩骨之間外屈出兩筋之間骨肉之際其氣滑利上二寸外屈出行兩筋之間上至肘內廉入於小筋之下留兩骨之會上入於

胷中內絡於心脉

中指之端中衝井也內屈循中指以上掌中勞宮榮也伏行兩骨之間外

屈出兩筋之間骨肉之際太陵腧也其氣滑利上二寸外屈出行兩筋之間間使經也上至肘內廉入於小筋

之下留兩骨之會者曲澤合也由此上入胃中內絡於心脉乃手厥陰經順行逆數之屈折○按本篇於十二經之屈折獨言手太陰心主二經者蓋欲引正下文少陰無腧之義故單以隔上二經為言耳諸經屈折詳義已具經脉本輸等篇故此不必再詳也

黃帝曰手少陰之脉獨無腧何也

岐伯曰少陰心脉也心者五藏六府之大主也精神之

所舍也其藏堅固邪弗能容也容之則心傷心傷則神

去神去則死矣故諸邪之在於心者皆在於心之包絡

包絡者心主之脉也故獨無腧焉

手少陰心經也手厥陰心包絡經也經雖

分二藏實一原但包絡在外為心之衛心為五藏六府之大主乃精神之所居其藏堅固邪不可傷傷及於心

無不死者故凡諸邪之在心者皆在心外之包絡耳然心為君主之官而包絡亦心所主故稱為心主凡治病者但治包絡之腧即所以治心也故少陰一經所以獨無腧焉詳義出本輸篇見經絡類十六

黃帝曰

少陰獨無腧者不病乎岐伯曰其外經病而藏不病故獨取其經於掌後銳骨之端其餘脉出入屈折其行之徐疾皆如手少陰心主之脉行也故本腧者皆因其氣之虛實徐疾以取之是謂因衝而寫因衰而補如是者邪氣得去真氣堅固是謂因天之序

凡藏府經絡有是藏則有是經藏居

於內經行於外心藏堅固居內邪弗能容而經則不能無病故少陰經病者當取掌後銳骨之端即神門腧也

其餘脉之出入屈折徐疾皆如手少陰心主之脉行者
言少陰心主之脉其行相似故曰本脉者言少陰本經
之脉非上文皆在心包之謂也然則邪在心包藏者當
治心主之脉邪在少陰經者當治本經之脉因其虛實
以取之則邪氣去而真氣固乃不失諸經天畀之序也
○按本輸篇所載五藏五脉六府六脉獨手少陰經無
腧故此篇特以為問正欲明心為大主無容邪傷之義
然既曰無腧而此節復言取其經於掌後銳骨之端及
如心主脉行本脉等義可見心藏無病則治藏無腧少
陰經有病則治經有腧故甲乙經備載少陰之脉云少
衝為井少府為榮神門為腧靈道為經少海
為合於十二經之脉始全其義蓋本諸此
黃帝曰持
鍼縱舍奈何
縱言從緩舍言弗用也
岐伯曰必先知十二經脉
之本末皮膚之寒熱脉之盛衰滑濇
明此數者則鍼之當用不當用其縱

舍可其脉滑而盛者病日進虛而細者久以持大以瀉

者為痛痺

此言病氣之盛及元氣之虛者皆難取速效當從緩治以漸除之者也

陰陽如

一者病難治

表裏俱傷血氣皆敗者為陰陽如一刺之必反甚當舍而勿鍼也

其本末

尚熱者病尚在

胃腹藏府為本經絡四支為末尚熱者餘邪未盡也宜從緩治

其熱以

衰者其病亦去矣

可舍鍼也

持其尺察其肉之堅脆大小滑

濇寒溫燥濕因視目之五色以知五藏而決死生視其

血脉察其色以知其寒熱痛痺

持尺視目義俱詳脉色類輕重死生於此可決

皆縱舍之道也

黃帝曰持鍼縱舍余未得其意也

不惟病形輕重有縱舍而

持鍼之際其進止退留亦有縱舍未得其詳因而復問岐伯曰持鍼之道欲端以

正安以靜先知虛實而行疾徐左手執骨右手循之無

與肉果寫欲端以正補必閉膚輔鍼導氣邪得淫洩真

氣得居

持鍼之道宜審而慎必從和緩從容庶可無誤故欲端以正安以靜先知病之虛實以施疾徐

之法左手執之右手循之必中其穴無中其肉而與肉果果即裏也寫者欲端以正補者必閉其膚以手輔鍼導引其氣必使邪氣淫洩而散真氣得復而居然後可以去鍼此持鍼縱舍之道也黃帝曰扞皮

開腠理奈何

扞說文技也謂恐刺傷其皮而開腠理則奈之何也

岐伯曰因其分

肉左別其膚微內而徐端之適神不散邪氣得去

凡用鍼者

必因其分肉之理左手循別其肌膚右手微內而徐端之則自然從容中窅神不散而邪氣去皮腠亦無傷也

六府之病取之於合

靈樞邪氣藏府病形篇○二十四

黃帝曰余聞五藏六府之氣榮輸所入為合令何道從

入入安連過願聞其故

五藏六府皆有五腧五腧之所入為合即各經之合穴也然手

之三陽復有連屬上下氣脉相通者亦謂之合故此以入安連過為問

岐伯答曰此陽脉

之別入於內屬於府者也

此下言六陽之經內屬於府因以明手之三陽下合在足

也

黃帝曰榮輸與合各有名乎岐伯荅曰榮輸治外經

合治內府

榮輸氣脉浮淺故可治外經之病合則氣脉深入故可治內府之病

黃帝曰治

內府奈何岐伯曰取之於合黃帝曰合各有名乎岐伯

答曰胃合於三里

胃足陽明也三里本經所入為合也

大腸合入於巨虛

上廉

大腸手陽明也本經之合在曲池其下腧則合於足陽明之巨虛上廉

小腸合入於

巨虛下廉

小腸手太陽也本經之合在小海其下腧則合於足陽明之巨虛下廉

三焦合

入於委陽

三焦手少陽也本經之合在天井其下腧則合於足太陽之委陽穴○按大腸小腸三焦

皆手三陽之經然大小腸為下焦之府連屬於胃其經雖在上而氣脈不離於下故合於足陽明之巨虛上下廉三焦為孤獨之府其於三部九候無所不統故經之在上者屬手腧之在下者居足所以十二經中惟此手之三陽乃有下腧故本輸篇曰大腸小腸皆屬於胃三焦下腧在於足小指之前少陽之後出於腓中外廉名

曰委陽即此謂也
詳經絡類十六

膀胱合入於委中央

膀胱足太陽也
委中即本經之

合膽合入於陽陵泉

膽足少陽也陽陵泉即本經之合

黃帝曰取之奈

何岐伯荅曰取之三里者低跗取之巨虛者舉足取之

委陽者屈伸而索之

委陽在承扶下六寸屈伸索之者屈其股以察承扶之陰紋伸其足

以度委陽之分寸也

委中者屈而取之陽陵泉者正豎膝予之齊

下至委陽之陽取之

正豎膝予之齊謂正身蹲坐使兩膝齊也委陽之陽當作委中之陽

蓋委中之外廉即陽陵泉之次也○豎上主切又去聲

取諸外經者揄申而從之

揄引也申明也取外經者在榮輸然亦必引正詳明方可從而治也○揄音余黃帝曰願聞六

府之病岐伯答曰面熱者足陽明病魚絡血者手陽明

病兩跗之上脉豎陷者足陽明病此胃脉也

足陽明之脉行於面

故為面熱手陽明之脉行於手魚之表故為魚絡血足面為跗兩跗之上脉即衝陽也豎者堅而實陷者弱而虛皆足陽明胃脉之病觀下文云大腸病者與胃同候則此胃脉也蓋兼手陽明而言

大腸病者

腸中切痛而鳴濯濯冬曰重感於寒即泄當臍而痛不

能久立與胃同候取巨虛上廉

曰當作月大腸屬胃故與胃同候巨虛上廉大

腸合也故當取之

胃病者腹臍脹胃脘當心而痛上支兩脇膈

咽不通飲食不下取之三里也

三里乃陽明之合故胃病者當取之○臍音臍

小腸病者小腹痛腰脊控睪而痛時窘之後當耳前熱

若寒甚若獨肩上熱甚及手小指次指之間熱若脉陷

者此其候也手太陽病也取之巨虛下廉

小腸氣化於小腹後附腰

脊下引睪九故為諸痛及不得大小便而時窘之後蓋即疝之屬也耳前肩上手小指次指之間皆手太陽之經故其病如此其候則脉有陷者巨虛下廉

三焦病者腹

氣滿小腹尤堅不得小便窘急溢則水留即為脹候在

足太陽之外大絡大絡在太陽少陽之間亦見於脉取

委陽

三焦受病則決瀆之官失其職水道不利故為腹堅滿為小便窘急為溢則水留而脹也委陽為三

焦下膈故當取而治之

膀胱病者小便偏腫而痛以手按之即欲

小便而不得肩熱若脉陷及足小指外廉及脛踝後

皆熱若脉陷取委中

此皆膀胱之府病取委中者足太陽經之合也

膽病

者善太息口苦嘔宿汁心下澹澹恐人將捕之噦中

哕然數唾在足少陽之本末亦視其脉之陷下者灸之

其寒熱者取陽陵泉

澹澹失意貌哕然有聲也本末者在府為本在經為末也其脉之

陷下者為不足故宜灸其寒熱者為有邪故宜取之陽陵泉即足少陽經之合也○噦音益哕音介

黃帝

曰刺之有道乎岐伯荅曰刺此者必中氣穴無中肉節

中氣穴則鍼染於巷中肉節即皮膚痛

經氣所至是謂氣穴肉有節界

是謂肉節染著也巷道也中其氣穴則鍼著脉道而經絡通失其氣穴則徒傷肉節而反為痛害矣○染一本

作補寫反則病益篤中筋則筋緩邪氣不出與其真相

搏亂而不去反還內著用鍼不審以順為逆也

補寫反用病必

益甚不中邪而中筋邪必乘虛反與真氣相亂還著於內皆以不審逆順用鍼者之罪也

邪在五藏之刺

靈樞五邪篇全○二十五

邪在肺則病皮膚痛寒熱上氣喘汗出欬動肩背

皮膚痛而

寒熱者皮毛為肺之合也氣喘汗出者肺主氣而腠理疎也肺為藏府之華蓋居於膈上故欬則動及肩背

取之膺中外腧

膺中之外腧雲門中府也手太陰本經穴但雲門忌深能令人逆息背三

節五節之傍以手疾按之快然乃刺之

也三椎之傍肺腧也五椎之傍心

腧也皆足太陽經穴以手疾按其處覺快爽者即其真穴乃可刺之取之缺盆中以越之

缺盆足陽明經穴也手太陰之脉上出於此故當取之以散越肺邪但忌太深令人逆息○邪在肝

則兩脇中痛寒中惡血在內行善掣節時脚腫

兩脇中痛肝之

經也寒中木乘脾胃也惡血在內肝所主也行善牽掣其關節肝主筋而邪居之也肝經自足大指上行內踝故時為取之行間以引脅下

行間足厥陰本經之榮故可以引去肝邪而止脇痛

補三里以溫胃中

三里足陽明經穴補以溫胃可去寒中

取血脉以散惡

血

取肝經血絡外見者可以散在內之惡血

取耳間青脉以去其掣

足少陽經循耳

前後足厥陰主諸筋而與少陽為表裏故取耳間青脉可以去掣節

○邪在脾胃則病肌

肉痛陽氣有餘陰氣不足則熱中善饑陽氣不足陰氣

有餘則寒中腸鳴腹痛陰陽俱有餘若俱不足則有寒

有熱

邪在脾胃則肌肉痛脾主肌肉也陽有餘則陰不足陽邪入府病在陽明故為熱中善饑陽不足則

陰有餘陰邪入藏病在太陰故為寒中腸鳴腹痛若脾胃之邪氣皆盛陰陽俱有餘也脾胃之正氣皆虛陰陽俱不足也故有寒

皆調於三里

此足陽明之合可兼治脾胃之病

○邪

在腎則病骨痛陰痺陰痺者按之而不得腹脹腰痛大

便難肩背頸項痛時眩

腎屬少陰而主骨故其病為骨痛陰痺又至真要大論陰痺義

更詳見運氣類二十五

取之湧泉崑崙視有血者盡取之

湧泉為足少陰

之升崑崙為足太陽之經按經脉篇以腰脊肩背頸項痛為足太陽病故當取崑崙餘為少陰病故當取湧泉二經表裏凡有血絡者皆當取之

○邪在心則病心痛喜悲時眩仆視

有餘不足而調之其輸也

邪在心者皆在心之包絡其應補應寫皆當取手厥陰心

主之輸

衛氣失常皮肉氣血筋骨之刺

靈樞衛氣失常篇○二十六

黃帝曰衛氣之留於腹中搖積不行苑蘊不得常所使

人肢脇胃中滿喘呼逆息者何以去之

衛氣者水穀之悍氣也其氣循

皮膚之中分肉之間熏於膏膜散於胃腹此衛氣之常也失其常則隨邪內陷留於腹中搖積不行而苑蘊為病故禁服篇曰衛氣為百病母也○苑鬱同

伯高曰其氣積於胃中者上取

之積於腹中者下取之上下皆滿者傍取之黃帝曰取

之奈何伯高對曰積於上寫人迎天突喉中

積於上者為喘呼逆

息故當寫之於上人迎足陽明經穴天突喉中俱任脉穴喉中即廉泉也

積於下者寫三里

與氣街

積於腹中者當寫其下三里氣街俱足陽明經穴

上下皆滿者上下取

之與季脇之下一寸重者難足取之

上下皆病則上下俱當取之如以上

五穴是也季脇之下一寸當是足厥陰經章門穴病之重者仍當難足取之謂攢而刺之也即官鍼篇合谷刺之謂詳見前六〇一本診視其脉大而弦急及絕不至云季脇之下深一寸

者及腹皮急甚者不可刺也

黃帝曰善

脉大而弦急陰虛而真藏見也

絕不至者營氣脫也腹皮急甚者中和氣絕而脾元敗也不宜刺矣

黃帝問於伯高曰何

以知皮肉氣血筋骨之病也伯高曰色起兩眉薄澤者

病在皮

兩眉者關中也其應主肺故病在皮

脣色青黃赤白黑者病在肌

肉

脾氣通於脣故病在肌肉

營氣

濡然者病在血氣

濡濕也營本無形若膚腠之汗

肌肉之脹二便之泄利皆濡然之謂其病在營則氣血也

目色青黃赤白黑者病在

筋

目為肝之竅
肝主筋也

耳焦枯受塵垢病在骨

耳為腎之竅
腎主骨也

黃

帝曰病形何如取之奈何伯高曰夫百病變化不可勝

數然皮有部肉有柱血氣有輸骨有屬黃帝曰願聞其

故伯高曰皮之部輸於四末

病在皮者在陽分也陽受
氣於四末以其皮淺氣浮

也故皮之部
輸於四末

肉之柱在臂脛諸陽分肉之間與足少陰

分間

病在肌肉當治其柱柱者腠之屬也堅厚之肉多
在手足三陽分肉間以肉主於脾而脾主四支也

足少陰之經自足心循內踝後入足跟以上腠內出腠
內廉上股內後廉會於尻臀貫脊其肉俱厚故亦為肉

柱之血氣之輸輸於諸絡氣血留居則盛而起

病在血氣
當治其輸

輸於諸絡謂諸經之絡穴也氣血留居則經絡壅盛故當取之筋部無陰無陽無左無

右候病所在

病在筋者不必分其陰陽左右但當隨病所在而治之

骨之屬者骨

空之所以受益而益腦髓者也

病在骨之屬者當治骨空以益其髓髓者骨之

充也故益髓即所以治骨骨空義詳經絡類十九

黃帝曰取之奈何伯高曰夫

病變化浮沉深淺不可勝窮各在其處病間者淺之甚

者深之間者小之甚者眾之隨變而調氣故曰上工

間者

病輕故用鍼宜淺宜小甚者病重故用鍼宜深宜眾病變無窮能隨其變而調治得宜者故曰上工

五亂之刺

靈樞五亂篇全○二十七

黃帝曰經脉十二者別為五行分為四時何失而亂何得而治岐伯曰五行有序四時有分相順則治相逆則亂黃帝曰何謂相順岐伯曰經脉十二者以應十二月十二月者分為四時四時者春秋冬夏其氣各異營衛相隨陰陽已和清濁不相干如是則順之而治

此下言一時血

氣之錯亂非宿疾有因之謂氣本五行故曰五亂

黃帝曰何謂逆而亂岐伯曰

清氣在陰濁氣在陽營氣順脉衛氣逆行清濁相干亂於胃中是謂大惋

清氣屬陽而升在陰則亂濁氣屬陰而降在陽則亂營氣陰性精專行常

順脉衛氣陽性慄悍畫當行陽夜當行陰若衛氣逆行則陰陽相犯表裏相干亂於胃中而為惋悶總由衛氣之為亂耳
惋母本切○故氣亂於心則煩心密嘿俛首靜伏亂於

肺則俛仰喘喝接手以呼亂於腸胃則為霍亂

氣亂於內者上

則在心肺下則在腸胃也

○嘿默同俛俯同又音免亂於臂脛則為四厥亂於頭

則為厥逆頭重眩仆

氣亂於外者下在於四肢上在於頭也

黃帝曰五亂

者刺之有道乎岐伯曰有道以來有道以去審知其道

是謂身寶

道言所由也邪之來去必有其道知其道則取病甚易是謂保身之寶也○按此四句雖

以鍼刺為言然實治法之要領不可不知也大凡疾病之生必有所自是有道以來也知其所自而徑拔之是

有道以去也能審其道則自外而入者自表而逐之自內而生者自裏而除之自上來者可越之自下來者可竭之自熱來者不遠寒自寒來者不遠熱自虛而實者先頌其虛無實則已自實而虛者先去其實無虛則已皆來去之道也俗云來處來去處去此言雖淺殊有深味誠足為斯道之法

黃帝曰善願聞

其道岐伯曰氣在於心者取之手少陰心主之輸

手少陰之

輸神門也心主之

氣在於肺者取之手太陰榮足少陰

輸

手太陰之榮魚際也足少陰之輸太谿也

氣在於腸

胃者取之足太陰陽明不下者取之三里

取足太陰之輸太白也足

陽明之輸陷谷也

三里亦足陽明穴氣在於頭者取之天柱大杼不知取

足太陽榮輸

天柱大杼俱足太陽經穴不知不應也當復取其榮輸二穴通谷束骨也

氣在

於臂足取之先去血脉後取其陽明少陽之榮輸

臂足之絡

有血者必先去其血在手者取手在足者取足手陽明之榮輸二間三間也手少陽之榮輸液門中渚也足陽明之榮輸內庭陷谷也足少陽之榮輸俠谿臨泣也黃帝曰補寫奈何岐伯曰徐

入徐出謂之導氣補寫無形謂之同精

凡行鍼補寫皆貴和緩故當徐

入徐出在導氣復元而已然補者導其正氣寫者導其邪氣總在保其精氣耳故曰補寫無形謂之同精是

非有餘不足也亂氣之相逆也

言本篇之法非為有餘不足而設特以亂氣相

逆但宜導治之如是耳此因帝問補寫故復及之以明其義也黃帝曰允乎哉道明乎

哉論請著之玉版命曰治亂也

四盛關格之刺

靈樞終始篇
○二十九

凡刺之道畢於終始明知終始五藏為紀陰陽定矣

終始

本篇名詳載陰陽鍼刺之道今散類各章

陰者主藏陽者主府

手足三陰俱主五藏手足

三陽俱主六府

陽受氣於四末陰受氣於五藏

陽主外故受氣於四末陰主內

故受氣於五藏四末手足末也

故寫者迎之補者隨之知迎知隨氣可

令和

迎者迎其來而奪之隨者隨其去而濟之

和氣之方必通陰陽五藏為

陰六府為陽傳之後世以血為盟敬之者昌慢之者亡

無道行私必得天殃

不明至道而強不知以為知即無道行私也伐人長命殃必及之天

道不與當知所畏

謹奉天道請言終始終始者經脉為紀

天道陰陽

有十二辰次為之紀人身血氣有十二經脉為之紀循環無端終而復始故曰終始

持其脉口人

迎以知陰陽有餘不足平與不平天道畢矣

脉口在手太陰脉也

可候五藏之陰人迎在頸陽明脉也可候六府之陽人之血氣經脉所以應天地陰陽之盛衰者畢露於此故曰天道所謂平人者不病不病者脉口人迎應四時也畢矣

上下相應而俱往來也六經之脉不結動也本末之寒

溫之相守司也形肉血氣必相稱也是謂平人

春夏人迎微大

秋冬寸口微大應四時也上謂人迎下謂脉口相應往來即如下篇所謂俱往俱來若引繩大小齊等也結瀯則不足動疾則有餘皆非平脉也藏氣為本肌體為末表裏寒溫司守不致相失故必外之形肉內之血氣皆相稱者謂少氣者脉口人迎俱少而不稱尺寸也如是之平人

者則陰陽俱不足補陽則陰竭寫陰則陽脫如是者可將以甘藥不可飲以至劑如此者弗灸不已者因而寫

之則五藏氣壞矣

少氣者元氣虛也兼陰陽而言故上之人迎下之脉口必皆衰少無力而

兩手之尺寸亦不相稱也凡陰陽氣俱不足者不可刺若刺而補陽則陰竭寫陰則陽脫如是者但可將以甘藥甘藥之謂最有深意蓋欲補虛羸非甘純不可也至劑剛毒之劑也正氣衰者不可攻故不宜用也非惟不

可攻而灸之亦不可以火能傷陰也臨此證者不可忘此節之義

人迎一盛病在足少

陽一盛而躁病在手少陽人迎二盛病在足太陽二盛

而躁病在手太陽人迎三盛病在足陽明三盛而躁病

在手陽明

人迎足陽明脉也一盛二盛謂大於氣口一倍二倍也陽明主表而行氣於三陽故人迎

一盛病在足經之少陽若大一倍而加以躁動則為陽中之陽而上在手經之少陽矣凡二盛三盛病皆在足

而躁則皆在手也下倣此人迎四盛且大且數名曰溢陽溢陽為外

格人迎盛至四倍且大且數者乃六陽偏盛之極盈溢於府格拒六陰是為外格按下文曰溢陰為內關內

關不通死不治則此外格者亦死無疑脉口一盛病又關格詳按見脉色類二十二所當互關

在足厥陰一盛而躁在手心主脉口二盛病在足少陰

二盛而躁在手少陰脉口三盛病在足太陰三盛而躁

在手太陰

脉口手太陰脉也太陰主裏而行氣於三陰故脉口一盛病在足經之厥陰若加以躁則

為陰中之陽而上在手厥陰心主矣凡脉口四盛且大

且數者名曰溢陰溢陰為內關內關不通死不治

脉口四盛

且大且數者乃六陰偏盛盈溢於藏表裏隔絕是為內關主死不治人迎與太陰脉口俱

盛四倍以上命曰關格關格者與之短期

人迎主陽脉口主陰若俱

盛至四倍以上則各盛其盛陰陽不交故曰關格可與言死期也人迎一盛寫足少陽

而補足厥陰二寫一補日一取之必切而驗之疎取之

上氣和乃止

人迎主府故其一盛病在膽經肝膽相為表裏陽實而陰虛故當寫足少陽之府補

足厥陰之藏也寫者二補者一寫倍於補也疎取之者欲其從容不宜急也上氣言氣之至也氣至而和穀氣

至矣故可止鍼下故此

人迎二盛寫足太陽補足少陰二寫一補

二日一取之必切而驗之疎取之上氣和乃止

人迎二盛病在

膀胱經膀胱與腎為表裏表實而裏虛故當寫足太陽補足少陰也二寫一補義見後疎取上氣義同前人

迎三盛寫足陽明而補足太陰二寫一補日二取之必

切而驗之疎取之上氣和乃止

人迎三盛病在胃經胃與脾為表裏胃實脾虛

故當寫足陽明補足太陰以
上三陽盛者俱二寫一補
脉口一盛寫足厥陰而補

足少陽二補一寫日一取之必切而驗之疎而取上氣

和乃止

脉口主藏故其一盛病在肝經肝實膽虛當寫足厥陰補足少陽也補寫義見後上氣義同前

脉口二盛寫足少陰而補足太陽二補一寫二日一取

之必切而驗之疎取之上氣和乃止

脉口二盛病在腎經腎經實膀胱虛

故當寫足少陰補足太陽也脉口三盛寫足太陰而補足陽明二補

一寫日二取之必切而驗之疎而取之上氣和乃止

脉口

三盛病在脾經脾實胃虛故當寫太陰補陽明也所以日二取之者太陽主胃

大富於穀氣故可日二取之也

此釋上文脾胃二經之治也太言太陰陽言陽

明脾胃與胃為表裏故曰太陽主胃二經皆富於穀氣較他藏為盛故可日二取之○按上文人迎之治治三陽也皆曰二寫一補氣口之治治三陰也皆曰二補一寫蓋以三陽主表病在表者宜寫倍於補也三陰在裏病在裏者宜補倍於寫也皆以藏氣為重惟恐其或傷耳又如厥陰少陽肝膽木藏也東方多實故可日二取之太陰陽明脾胃也脾胃大富於穀氣故可日二取之惟少陰太陽則二日一取之蓋腎與膀胱為天一之藏真陰之原故宜保重如此聖人之顧根本豈惟鍼刺為然哉

人迎與脉口俱盛三倍

以上命曰陰陽俱溢如是者不開則血脉閉塞氣無所行流淫於中五藏內傷如此者因而灸之則變易而為

他病矣

俱盛三倍以上即四盛也陰陽俱溢即溢陰溢陽也不開即外關內格也如此者血氣閉塞無

所行五藏真陰傷於內刺之已不可灸之則愈亡其陰而變生他病必至不能治也

約方關格之刺

靈樞禁服篇全○二十九

雷公問於黃帝曰細子得受業通於九鍼六十篇旦暮勤服之近者編絕久者簡垢然尚諷誦弗置未盡解於意矣外揣言渾束為一未知所謂也夫大則無外小則無內大小無極高下無度束之奈何士之才力或有厚薄智慮褊淺不能博大深奧自強於學若細子細子恐

其散於後世絕於子孫敢問約之奈何

六十篇古經數也今失其傳編

絕簡垢即韋編三絕之謂垢塵汚也蓋古時無紙書於竹簡以熟皮編之故曰韋編外揣本經篇名所言渾束

為一大則無外等義見前十二

黃帝曰善乎哉問也此先師之所禁坐

私傳之也割臂歃血之盟也子若欲得之何不齋乎雷

公再拜而起曰請聞命於是也乃齋宿三日而請曰敢

問今日正陽細子願以受盟黃帝乃與俱入齋室割臂

歃血黃帝親祝曰今日正陽歃血傳方有敢背此言者

反受其殃雷公再拜曰細子受之黃帝乃左握其手右

授之書曰慎之慎之吾為子言之

盟者以血塗口傍凡曰軟血。軟音霎

刺之理經脉為始營其所行知其度量內刺五藏外刺

六府

經脉為始必先明經絡也營其所行營行有終始也知其度量脉度有短長也內刺五藏外刺六府

分表裏出入也○此六句與經脉篇畧同詳經絡類首章

審察衛氣為百病母

衛氣者陽

氣也衛外而為固者也陽氣不固則衛氣失常而邪從衛入乃生疾病故為百病母義詳本類前二十六及疾

病類

四 調其虛實虛實乃止寫其血絡血盡不殆矣

寫實則虛

補虛則實故虛實乃止病在血者調之絡邪血去盡則不殆矣

雷公曰此皆細子之所

以通未知其所約也黃帝曰夫約方者猶約囊也囊滿

而弗約則輸泄方成弗約則神與弗俱

約者要也約方約囊其道同也

囊滿弗約則輸泄而傾方成弗約則不切於用蓋雜則不精也易曰精義入神以致用也不得其精焉能入神有方無約即無神也故曰神與弗俱所謂約者即前外揣篇渾束為一之義

雷公曰願為下

材者弗滿而約之

滿言欲博約言欲精弗滿而約之謂亦有不由博學而可得其捷徑者否

也故曰願為下材

黃帝曰未滿而知約之以為工不可以為天

下師

因滿而約約之善也由博而精精之至也未滿而知約何約之有未博而言精何精之有若是者謂

之為工安足為天下師是以言約者非滿不可言精者非博不可也

雷公曰願聞為工黃

帝曰寸口主中人迎主外兩者相應俱往俱來若引繩

大小齊等春夏人迎微大秋冬寸口微大如是者名曰

平人

太陰行氣於藏故寸口主中陽明行氣於府故人迎主外人迎寸口一表一裏也故往來相應欲其

大小齊等若引繩之勻者是為和調之脈然人迎主陽故必於春夏微大寸口主陰故必於秋冬微大乃謂之平人也人迎大一倍於寸口病在足少陽一倍而躁在手

少陽人迎二倍病在足太陽二倍而躁病在手太陽人

迎三倍病在足陽明三倍而躁病在手陽明

義見前章

盛則

為熱虛則為寒緊則為痛痺代則乍甚乍間

此言人迎脈也乍甚

乍間即下文乍痛乍止之謂

盛則寫之虛則補之緊痛則取之分肉

代則取血絡且飲藥陷下則灸之不盛不虛以經取之

名曰經刺

緊則為痛痺故當取分肉代因血氣不調故當取血絡且飲調和之藥脉陷下不起者有

寒滯故宜灸之若不因血氣之盛處而病有留於經絡者則當隨經所在或飲藥或灸刺以取之也經刺義見

前第五

人迎四倍者且大且數名曰溢陽溢陽為外格死

不治必審按其本末察其寒熱以驗其藏府之病

脉之偏盛

至於四倍者乃為關格不治之證若一倍二倍三倍不過為病而但有輕重之分耳故當審其致病之本末察其寒熱藏府而施之治也寸口大於人迎一倍病在足厥陰一倍而

躁在手心主寸口二倍病在足少陰二倍而躁在手少

陰寸口三倍病在足太陰三倍而躁在手太陰

人迎寸口相為

表裏故上文云人迎一倍病在足少陽此云寸口一倍病在足厥陰膽與肝為表裏也一倍而躁人迎在手少陽寸口在手心主三焦包絡為表裏也凡後二倍三倍表裏皆然

盛則脹滿寒中食不

化虛則熱中出糜少氣溺色變緊則痛痺代則乍痛乍

止

此言寸口脉也盛則外實中虛故為脹滿寒中食不化虛則真陰不足故為熱中出糜少氣溺色變糜謂

泄瀉糜爛之物

盛則寫之虛則補之緊則先刺而後灸之代則

取血絡而後調之陷下則徒灸之陷下者脉血結於中

中有著血血寒故宜灸之不盛不虛以經取之

緊則為寒故宜

先刺後灸欲其經易通寒易去也脉陷下者以寒著於血而血結為滯故宜灸之也代則取血絡及不盛不虛

義見上文

寸口四倍者名曰內關內關者且大且數死不治

必審察其本末之寒溫以驗其藏府之病

義同前人迎四倍者

通

其營輸乃可傳於大數大數曰盛則徒寫之虛則徒補

之緊則灸刺且飲藥陷下則徒灸之不盛不虛以經取

之所謂經治者飲藥亦曰灸刺脉急則引脉大以弱則

欲安靜用力無勞也

營經脉也輸榮輸也大數大法也即經脉本輸終始禁服等篇之義

徒但也陷下義見上文經取之即所謂經治者或飲藥或灸刺皆可隨經所宜而治也脉急者邪盛也宜設法

引去之脉大以弱者陰不足也宜安靜以養陰用力無勞也凡此皆大數大法也故確知其盛則但寫之確知其虛則但補之確知其宜灸刺則以灸刺宜藥餌則以藥餌然必資學力庶能無惑是即約方之要渾東為一之義也若未滿而云約者必不學無術之下材耳焉得為工尚敢曰人之師哉學者於此必不可自欺以欺人也

繆刺巨刺

素問繆刺論全○三十

黃帝問曰余聞繆刺未得其意何謂繆刺

繆異也左病刺右右病刺

左刺異其處故曰繆刺治奇邪之在絡者也

岐伯對曰夫邪之客於形也必

先舍於皮毛留而不去入舍於孫脉留而不去入舍於

絡脉留而不去入舍於經脉內連五藏散於腸胃陰陽俱感五藏乃傷此邪之從皮毛而入極於五藏之次也

如此則治其經焉

邪氣自淺入深而極於五藏之次者當治其經治經者十二經穴之正刺

也尚非繆刺之謂

今邪客於皮毛入舍於孫絡留而不去閉塞

不通不得入於經流溢於大絡而生奇病也

大絡者十二經支別

之絡也病在支絡行不由經故曰奇邪

夫邪客大絡者左注右右注左上

下左右與經相干而布於四末其氣無常處不入於經

俞命曰繆刺

支而橫者為絡邪客於大絡故左注右右注左布於四末而氣無常處故當治以繆

刺帝曰願聞繆刺以左取右以右取左奈何其與巨刺

何以別之岐伯曰邪客於經左盛則右病右盛則左病

亦有移易者左痛未已而右脉先病如此者必巨刺之

必中其經非絡脉也

繆刺之法以左取右以右取左巨刺亦然但巨刺者刺大經者也故

曰巨刺繆刺者刺其大絡異於經者也故曰繆刺故絡

病者其痛與經脉繆處故命曰繆刺

絡淺經深絡橫經直故其病繆處也

○帝曰願聞繆刺奈何取之何如岐伯曰邪客於足少

陰之絡令人卒心痛暴脹胸脇支滿

足少陰別絡並本經上腎從腎上貫

肝腸走於心
包故病如此
無積者刺然骨之前出血如食頃而已

雖疾

如上也而內無積聚者刺然骨之前即足少陰之榮然谷
穴也食頃一飯頃也後放此○王氏曰刺此多出血然

人立饑
欲食

不已左取右右取左

如病不在左者取右然谷在右者取左然谷此即

繆刺之法
也餘準此

病新發者取五日已

病新發者邪未深也雖不即愈亦不過五日而

已矣

○邪客於手少陽之絡令人喉痺舌卷口乾心煩臂

外廉痛手不及頭

手少陽之支別上出缺盆上項注胃中合心主其經出臂外兩骨之間貫

肘上肩故
病如此

刺手中指次指爪甲上去端如韭葉各一痛

中指當作小指謂手少陽之井關衝穴也左壯者立已

老者有頃已左取右右取左此新病數日已

上言左右各一瘡以

左右俱病也此言左取右右取左以病有偏著也皆繆刺之法後準此新病數日已蓋言有不即已者若係新病亦不出數日而已也 ○邪客於足厥陰之絡令人卒疝暴痛

足厥

陰之別循脛上鞞結於莖故為疝痛

刺足大指爪甲上與肉交者各一瘡

此足厥陰之井大數穴也

男子立已女子有頃已左取右右取左

男陽

女陰陽氣至速陰氣至遲也

○邪客於足太陽之絡令人頭項肩痛

足太陽支者從巔下行還出別下項循肩膊內故為是病

刺足小指爪甲上與肉交

者各一瘡立已

足太陽之井至陰穴也

不已刺外踝下三瘡左取

右右取左如食頃已

外踝下足太陽之郄金門穴也三痛三刺也一日一刺得效乃已食

頃義見前

○邪客於手陽明之絡令人氣滿胃中喘息而支

肱胃中熱

手陽明之脉下入缺盆絡肺下膈其支者從缺盆上頸故為此病

刺手大指

次指爪甲上去端如韭葉各一痛左取右右取左如食

頃已

手陽明之井商陽穴也

○邪客於臂掌之間不可得屈刺其

踝後

邪客於臂掌之間手厥陰經也踝後者以兩踝言踝中之後則內關也內關為手厥陰之絡故當取

之先以指按之痛乃刺之以月死生為數月生一日一

痛二日二痛十五日十五痛十六日十四痛

月之死生隨日盈縮

以為數也故自初一至十五日日以盈為之生數當一日一痛一痛即一刺也至十五日漸增至十五痛矣自十六至三十日月日以縮為之死數當日減一刺故十六日止十四痛減至月終惟一刺矣蓋每日一刺以朔望為進止也

○邪客於足陽蹻之脉令人目痛從內眥始

陰陽

蹻脉俱起於足跟其氣上行皆屬於目內眥故病如此

刺外踝之下半寸所各二

痛左刺右右刺左如行十里頃而已

外踝之下半寸所足太陽申脉也陽

蹻所生故宜刺之

○人有所墮墜惡血留內腹中滿脹不得前

後先飲利藥此上傷厥陰之脉下傷少陰之絡刺足內

踝之下然骨之前血脉出血

先飲利藥逐留內之瘀血也凡墮墜者必病在筋骨

故上傷厥陰之脉肝主筋也下傷少陰之絡刺足跗上

腎主骨也刺然骨之前出血即少陰絡也

動脉足厥陰之腧太衝穴也○按王氏謂為陽明之衝陽似與此無涉

不已刺三毛上

各一瘡見血立已左刺右右刺左

足厥陰之井大敦穴也

善悲驚

不樂刺如右方

墮跌傷陰神氣散失故善悲驚不樂

○邪客於手陽明之

絡令人耳聾時不聞音

手陽明之別者入耳故為耳聾

刺手大指次指

爪甲上去端如韭葉各一瘡立聞

手陽明之井商陽穴也

不已刺

中指爪甲上與肉交者立聞

中指爪甲上手厥陰之井中衝穴也以心主之脉出

耳後合少陽完骨之下故宜取之

其不時聞者不可刺也

時或有聞者尚為可治其

不聞者絡氣已絕刺耳中生風者亦刺之如此數左刺亦無益故不可刺也

右右刺左

耳中如風聲者雖聾猶有所聞故宜刺如前數當左右繆取之

○凡痺往來

行無常處者在分肉間痛而刺之以月死生為數用鍼

者隨氣盛衰以為瘡數鍼過其日數則脫氣不及日數

則氣不寫左刺右右刺左病已止不已復刺之如法

在分

肉間痛而刺之謂隨痛所在求其絡而繆刺之也

月生一日一瘡二日二瘡漸

多之十五日十五瘡十六日十四瘡漸少之

此即月死生之數義

如前○按本篇以月死生為數如上節曰用鍼者隨氣盛衰以為瘡數鍼過其日數則脫氣不及日數則氣不

寫此氣候之刺數也觀前二十九章曰厥陰少陽日一
取之太陰陽明日二取之少陰太陽二日一取之此又
諸經亦有刺數當與此參酌○邪客於足陽明之絡今
為用而別其盛衰庶乎盡善

人軌衄上齒寒

足陽明之脉起於鼻之交頰中
下循鼻外入上齒故絡病如此

刺足中

指次指爪甲上與肉交者各一痛左刺右右刺左

中指
次指

皆足陽明所出之
經即厲兌穴次也

○邪客於足少陽之絡令人脇痛不

得息欬而汗出

足少陽走者下胷中貫
膈循脇肋故為此病

刺足小指次指

爪甲上與肉交者各一痛

足少陽之井
竅陰穴也

不得息立已汗

出立止欬者溫衣飲食一日已左刺右右刺左病立已

不已復刺如法

溫衣飲食言飲食俱宜煖也

○邪客於足少陰之絡

令人噎痛不可內食無故善怒氣上走賁上

足少陰之脉循喉嚨

故噎痛不可內食其別者并經上走於心包故善怒而氣上走於賁門之上蓋邪在少陰腎水必虛陰火上熾故為噎痛善怒等病

內納同賁奔秘二音

○刺足下中央之脉各三瘡凡六

刺立已左刺右右刺左

足下中央少陰之井湧泉穴也左右俱痛者各刺三瘡痛在一

邊者繆刺之

噎中腫不能內唾時不能出唾者刺然骨之前

出血立已左刺右右刺左

然骨之前足少陰之榮然谷穴也

○邪客於

足太陰之絡令人腰痛引少腹控眇不可以仰息

足太陰之

脉絡上入腹布胃脇而筋著於脊
故為病如此控引也眇季脇下也
刺腰尻之解兩腫之

上是腰俞以月死生為瘡數發鍼立已左刺右右刺左

腰尻骨解兩腫之上者督脉腰俞之傍也以月死生為
瘡數義如前腰俞止一穴居中本無左右此言左取右

右取左者必腰俞左右即足太陽之下膠穴
也腰尻兩腫義詳本類後四十九○腫音申○邪客於

足太陽之絡令人拘攣背急引脇而痛
足太陽經挾脊抵腰中故拘攣

背急其筋從腋後入
腋下故引脇而痛 刺之從項始數脊椎俠脊疾按之

應手如痛刺之傍三瘡立已
此刺不拘俞穴但自項大椎為始從下數其脊椎或

開一寸半或開三寸俠脊處疾按之應手而
痛即刺處也脊之兩傍各刺三瘡病當自已○邪客於

足少陽之絡令人留於樞中痛髀不可舉

樞中髀樞也足少陽脉所

由行刺樞中以毫鍼寒則久留鍼以月死生為數立已

者髀樞中足少陽環跳穴也若寒者須久留鍼則寒邪乃去故以月死生為數

○治諸經刺之

所過者不病則繆刺之

諸經所過者不病言病不在經而在絡也故繆刺之若病刺在

經則謂之巨刺矣

○耳聾刺手陽明不已刺其通脉出耳前者

此復言手陽明之耳聾當刺商陽如前也刺其通脉出耳前者手陽明脉正當足少陽聽會之分也

○齒

齲刺手陽明不已刺其脉入齒中者立已

齲齒痛也手陽明之脉貫

頰入下齒中故當刺大腸經之商陽也如不已則刺其痛脉之入齒中者○按甲乙經注手陽明脉商陽二間

三間合谷陽谿偏歷溫溜七
穴皆主齒痛○齩邱禹切

○邪客於五藏之間其病

也脉引而痛時來時止視其病繆刺之於手足爪甲上

邪客於五藏之間必各引其經而視其脉出其血間日
痛但視病處各取其井而繆刺之

一刺一刺不已五刺已

有血絡者當刺去其血亦如數

○繆傳引上齒

齒脣寒痛視其手背脉血者去之

繆傳者病在下齒而引及上齒也上齒屬

足陽明下齒屬手陽明今上下引痛者當視手陽明之絡有血者先去之

足陽明中指爪甲

上一痛手大指次指爪甲上各一痛立已左取右取

左

足陽明中指爪甲上謂厲兌穴也手大指次指爪甲上手陽明商陽穴也

○邪客於手足

少陰太陰足陽明之絡此五絡皆會於耳中上絡左角

手少陰心也足少陰腎也手太陰肺也足太陰脾也足陽明胃也五絡皆會於耳中上絡左額之角五絡

俱竭令人身脉皆動而形無知也其狀若尸或曰尸厥

五絡俱竭陰陽離散也身脉皆動筋惕肉瞤也上下離竭厥逆氣亂昏憤無知故名尸厥刺其足大

指內側爪甲上去端如韭葉足太陰之井隱白穴也後刺足心足少

陰之井湧泉穴也後刺足中指爪甲上各一疳足陽明之井厲兌穴也後

刺手大指內側去端如韭葉手太陰之井少商穴也後刺手心主

手厥陰之井中衝穴也凡邪之在心者皆在於心之包絡故取之少陰銳骨之端各一

瘡立已

謂神門穴手少陰之腧也

不已以竹管吹其兩耳

以小竹管納對耳孔

用力吹之勿令氣泄所以溫助五絡氣可復通也○新校正云按陶隱居謂吹其左耳極三度復吹其右耳三

度也鬻其左角之髮方一寸燔治飲以美酒一杯不能飲

者濯之立已

鬻剃同左角之髮五絡之血餘也燔治燒製為末也飲以美酒助藥力行血氣也補

以其類故可使尸厥立已

○凡刺之數先視其經脉切而從之審其

虛實而調之不調者經刺之

病在經者治從其經但審其虛實而調之調者如湯

液導引之類皆是也調之而不調然

有痛而經不病者

繆刺之


有痛而經不病者病在大絡也故當繆刺之

因視其皮部有血絡者

盡取之此繆刺之數也

皮部有血絡者邪在皮膚孫絡也故當盡取其血凡此刺經者

刺大絡者刺皮部血絡者各有其治所以辨繆刺之術數也



類經卷二十

欽定四庫全書

子部
類經卷二十一

詳校官太醫院恩授臣袁天錫

編修臣倉聖脈覆勘

總校官知縣臣楊懋珩

校對官中書臣范來宗

謄錄監生臣李璜

欽定四庫全書

類經卷二十一

明 張介賓 撰

鍼刺類

陰陽形氣外內易難

靈樞壽夭剛柔篇○三十一

黃帝問於少師曰余聞人之生也有剛有柔有弱有強有短有長有陰有陽願聞其方少師荅曰陰中有陰陽中有陽審知陰陽刺之有方

剛柔強弱短長無非陰陽之化然曰陰曰陽人皆知

之至若陰中復有陰陽中復有陽則人所不知也故當詳審陰陽則刺得其方矣

得病所始刺

之有理謹度病端與時相應內合於五藏六府外合於

筋骨皮膚

得病所始者謂知其或始於陰或始於陽故刺之有理也謹度病端者謂察其風因木化

熱因火化濕因土化燥因金化寒因水化故與時相應也內而五藏六府外而筋骨皮膚莫非此理合而求之得其病是故內有陰陽外亦有陰陽在內者五藏為陰之原矣

六府為陽在外者筋骨為陰皮膚為陽

內為陰外為陽理之常也然內

有陰陽外亦有陰陽故在內者五藏為陰藏屬裏也六府為陽府屬表也在外者筋骨深而為陰皮膚淺而為陽所以陰陽之中復有陰陽即如五藏皆有血氣六府亦有血氣血在六府則陽中之陰氣則陽中之陽也氣在五藏則陰中之陽血則陰中之陰也皮膚筋骨無不皆然故天元紀大論曰天有陰陽地亦有陰陽其義即

此由此觀之可見陰陽合一之道則無往不在故曰病在陰之陰者刺陰之

榮輸

陰之陰者陰病在陰分也當刺其榮輸以諸經榮輸氣微亦陰之類如手太陰經魚際為榮太淵為

輸者是也

病在陽之陽者刺陽之合

陽之陽者陽病在陽分也當刺其合穴蓋所入

為合猶在陽分刺此以防深入如手陽明經曲池之類是也

病在陽之陰者刺陰之

經陽之陰者陽病在陰也當刺陰之經穴蓋所行為經其氣正盛即陰中之陽如手太陰經渠之類是也

病在陰之陽者刺絡脉

陰之陽者陰病在陽也當刺諸絡脉蓋絡脉浮淺皆在陽分如

手陽明經偏歷之類是也

故曰病在陽者命曰風病在陰者命曰痺

病陰陽俱病命曰風痺

陽受風氣故在陽者命曰風邪入於陰則痺故在陰者命曰痺

病有形而不痛者陽之類也

病淺在外也

無形而痛者陰之

類也

病深在內也

無形而痛者其陽完而陰傷之也急治其

陰無攻其陽有形而不痛者其陰完而陽傷之也急治

其陽無攻其陰

完固也病在陰者勿攻其陽病在陽者勿攻其陰凡表裏虛實其治皆然陰

陽俱動乍有形乍無形加以煩心命曰陰勝其陽此謂

不表不裏其形不久

陰陽俱動表裏皆病也乍有形乍無形往來不常也加以煩心陰病

甚於陽也大凡治病必求於本若求其在表而裏亦病求其在裏而表亦病此以陰陽並傷故曰不表不裏治之為難形○黃帝問於伯高曰余聞形氣病之先後外將不久矣

內之應奈何

形見於外氣運於中病傷形氣則或先或後必各有所應

伯高荅曰風

寒傷形憂恐忿怒傷氣氣傷藏乃病藏寒傷形乃應形

風傷筋脉筋脉乃應此形氣外內之相應也

風寒外襲故傷於形

情慙內勞故傷於氣內傷則病在藏府外傷則應於皮毛若風傷筋脉則居於外內之間故應於筋脉此形氣表裏之有辨也黃帝曰刺之奈何伯高荅曰病九日者三刺而

已病一月者十刺而已多少遠近以此衰之

大約病三日者可一

刺而已故九日者當三刺一月者當十刺凡病久痺不之多少遠近當推此以衰去之是刺之大法也久痺不

去身者視其血絡盡出其血

久痺不去身者其身不能往來以陰邪在於血脉故

當視其血絡而盡去之

黃帝曰外內之病難易之治奈何

上文言久近之

難易故此復問外內之難易

伯高荅曰形先病而未入藏者刺之半

其日

外病而內不病者其病淺故當半其日謂減於前法日數之半如病一月者可五刺而已也

藏

先病而形乃應者刺之倍其日此月內難易之應也

內病

而應於外者其病深故當倍其日如淺者一月五次重者一月十刺也病有淺深故治有難易耳

刺有三變營衛寒痺

靈樞壽夭剛柔篇○三十二

黃帝曰余聞刺有三變何謂三變伯高荅曰有刺營者

有刺衛者有刺寒痺之留經者

刺營者刺其陰刺衛者刺其陽刺寒痺者溫其

經三刺不同
故曰三變

黃帝曰刺三變者奈何伯高荅曰刺營者

出血刺衛者出氣刺寒痺者內熱

調經論亦曰取血於營取氣於衛內熱義

如下

黃帝曰營衛寒痺之為病奈何伯高荅曰營之生

病也寒熱少氣血上下行

營主血陰氣也病在陰分則陽勝之故為寒熱往來陰病

則陰虛陰虛則無氣故為少氣邪在血故為上下妄行所以刺營者當刺其血分

衛之生病也

氣痛時來時去怫懣賁響風寒客於腸胃之中

衛屬陽為水穀

之悍氣病在陽分故為氣痛氣無定形故時來時去怫懣怒也懣大息也賁響腹鳴如奔也皆氣分之病風寒外襲而客於腸胃之間以六府屬表而陽邪歸之故病亦生於衛氣
○怫音佛懣音戲
寒痺之為

病也留而不去時痛而皮不仁

寒痺久留不去則血脈不行或凝滯而為痛或

皮膚不知痛

黃帝曰刺寒痺內熱奈何伯高答曰刺布

衣者以火焯之刺大人者以藥熨之

內熱謂溫其經也布衣血氣濇濁故

當以火焯之即近世所用雷火鍼及艾蒜蒸灸之類○焯音翠灼也

黃帝曰藥熨奈何伯

高答曰用淳酒二十升蜀椒一升乾薑一斤桂心一斤

凡四種皆咬咀漬酒中用綿絮一斤細白布四丈并內

酒中置酒馬矢煨中蓋封塗勿使泄五日五夜出布綿

絮曝乾之乾復漬以盡其汁每漬必晬其日乃出乾乾

并用滓與綿絮複布為複巾長六七尺為六七巾則用
之生桑炭灸巾以熨寒痺所刺之處令熱入至於病所
寒復灸巾以熨之三十遍而止汗出以巾拭身亦三十

遍而止

用吹咀古人以口嚼藥碎如豆粒而用之後世雖
用刀切而猶稱吹咀者其義本此漬浸也馬矢

煨中者燃乾馬屎而煨之也此西北方所常用者塗鹽
泥封固也晬周日也複布為複巾者重布為巾如今之
夾袋所以盛貯綿絮藥滓也滓相也灸巾以生桑炭者
桑能利關節除風寒濕痺諸痛也大人血氣清滑故當
於未刺之先及既刺之後但以藥熨則經通汗出而寒
痺可除矣○內納同矢屎同煨音愠晬音醉滓音子複

音起步內中無見風每刺必熨如此病已矣此所謂內

熱也刺後起步於密室內中欲其血氣行而慎避風寒也凡此者皆所謂內熱之法

刺有五節

靈樞刺節真邪篇○三十三

黃帝問於岐伯曰余聞刺有五節奈何岐伯曰固有五節一曰振埃二曰發矇三曰去爪四曰徹衣五曰解惑黃帝曰夫子言五節余未知其意岐伯曰振埃者刺外經去陽病也發矇者刺府輸去府病也去爪者刺關節肢絡也徹衣者盡刺諸陽之奇輸也解惑者盡知調陰陽補寫有餘不足相傾移也

振埃者猶振落塵埃故取其外經可以去陽病也發

矇者猶開發矇瞶故刺其府輸可以治府病也去爪者猶脫去餘爪故取闕節肢絡可以治血道不通之病也徹衣者猶徹去衣服故當盡刺諸陽之奇輸也解惑者猶解其迷惑故在盡知陰陽調其虛實可以移易其病也

黃帝曰刺節言振埃夫子乃言刺外經去陽病余不

知其所謂也願卒聞之岐伯曰振埃者陽氣大逆上滿

於胸中憤瞋肩息大氣逆上喘喝坐伏病惡埃煙餽不

得息請言振埃尚疾於振埃

陽邪在上故滿於胸中為憤瞋肩息氣逆喘喝如埃

如煙餽不得息等證治在上者尚疾於振埃謂其疾如拂塵也○瞋昌真切餽古噎字食不下也

黃帝

曰善取之何如岐伯曰取之天容

天容手太陽經穴

黃帝曰其

效上氣窮咄胸痛者取之奈何岐伯曰取之廉泉

廉泉任脉

穴。咄音屈不伸也

黃帝曰取之有數乎岐伯曰取天容者無過

一里取廉泉者血變而止帝曰善哉

無過一里如人行一里許也血變血

色變也

○黃帝曰刺節言發矇余不得其意夫發矇者耳

無所聞目無所見夫子乃言刺府輸去府病何輸使然

願聞其故

耳無所聞目無所見者刺府輸可愈故曰發矇

岐伯曰妙乎哉問也

此刺之大約鍼之極也神明之類也口說書卷猶不能

及也請言發矇耳尚疾於發矇也

疾於發矇取效之速也

黃帝曰

善願卒聞之岐伯曰刺此者必於日中刺其聽宮中其

眸子聲聞於耳此其輸也

日中陽王氣行之時也聽宮手太陽府輸也其脉與目相

通故能中其眸子刺之而聲應於耳乃其穴也

黃帝曰善何謂聲聞於耳岐伯

曰刺邪以手堅按其兩鼻竅而疾偃其聲必應於鍼也

此驗聲之法也刺其穴以手堅按鼻孔而疾為偃卧其聲則應於鍼也

黃帝曰善此所謂

弗見為之而無目視見而取之神明相得者也

謂疾無形見有

不必相見而取者真有神明相得之妙也

○黃帝曰刺節言去爪夫子乃言

刺關節肢絡願卒聞之岐伯曰腰脊者身之大關節也

肢脛者人之管以趨翔也莖垂者身中之機陰精之候

津液之道也

以腰脊所以立身故為身之大關節肢脛所趨翔故為人之管管鍵也莖垂者前陰

宗筋也命門元氣盛衰具見於此故為身中之機精由此泄故可以候陰精而為津液之道故飲食不

節喜怒不時津液內溢乃下留於臑血道不通日大不

休俛仰不便趨翔不能此病榮然有水不上不下鉞石

所取形不可匿常不得蔽故命曰去爪帝曰善

飲食不節病在

太陰陽明喜怒不時病在少陰厥陰故其津液內溢則下留於臑為日大不休不可蔽匿等證蓋即癰疽之類治之者當察在何經以取其關節肢絡故命曰去爪者猶去其贅疣也○臑音高陰九也鉞音披義見前○

黃帝曰刺節言徹衣夫子乃言盡刺諸陽之奇輸未有
常處也願卒聞之岐伯曰是陽氣有餘而陰氣不足陰
氣不足則內熱陽氣有餘則外熱內熱相搏熱於懷炭
外畏綿帛近不可近身又不可近席腠理閉塞則汗不
出舌焦脣槁腊乾嗑燥飲食不讓美惡

陽氣有餘陰氣不足陽邪盛而

真陰衰也熱於懷炭熱之盛也外畏綿帛近不欲衣也
不可近身畏人氣也不可近席憎寒也腊乾肌肉乾燥
也飲食不讓美惡滋味
不能辨也○腊音昔黃帝曰善取之奈何岐伯曰取

之於其天府大杼三痛又刺中膺以去其熱補足手太

陰以出其汗熱去汗稀疾於徹衣黃帝曰善

天府手大陰經穴大

抒中膺俞俱足太陽經穴刺此皆可以去熱又補足大陰脾經手太陰肺經以出其汗熱去汗止而病除其速有如徹衣此蓋傷寒邪熱之類也

○黃帝曰刺節言解惑夫子乃言盡

知調陰陽補寫有餘不足相傾移也惑何以解之岐伯

曰大風在身血脉偏虛虛者不足實者有餘輕重不得傾

側宛伏不知東西不知南北乍上乍下乍反乍覆顛倒無

常甚於迷惑

風邪在身血脉必虛正不勝邪故為輕重傾側等病以其顛倒無常故曰甚於迷惑

此即中風之類黃帝曰善取之奈何岐伯曰寫其有餘補其不

足陰陽平復用鍼若此疾於解感黃帝曰善請藏之靈
蘭之室不敢妄出也

盡知陰陽平其虛實用鍼若此疾無不瘳矣故曰疾於解感

五邪之刺

靈樞刺節真邪篇○二十四

黃帝曰余聞刺有五邪何謂五邪岐伯曰病有持癰者
有容大者有狹小者有熱者有寒者是謂五邪黃帝曰
刺五邪奈何岐伯曰凡刺五邪之方不過五章痺熱消
滅腫聚散亡寒痺益溫小者益陽大者必去請道其方

五章五條也
詳如下文

○凡刺癰邪無迎隴易俗移性

癰盛也營衛生會篇

曰日中而陽隴生氣通天論作隆蓋隴隆通用也無迎
隴者癰邪之來銳所當避也易俗移性謂宜從緩調和
如移易俗性不宜欲速此釋不得膿脆道更行
上文腫聚散亡也○隴音籠
謂凡癰毒不化則不得膿故或托其內或溫其外去其
或刺以鍼或灸以艾務化其毒昏脫道更行也

鄉不安處所乃散亡諸陰陽過癰者取之其輸寫之

向鄉

也安留聚也去其毒氣所向不使安留處所乃自消散
矣故於諸陰經陽經但察其過於壅滯者皆當取輸穴
以寫其銳氣是即
○凡刺大邪日以小泄奪其有餘乃

所謂去其鄉也

益虛
大邪實邪也邪氣盛大難以頓除日促小之自可
漸去去其有餘實者虛矣此釋上文大者必去也

剽其通鍼其邪
剽砭刺也通病氣所由之道也
○剽音栗
肌肉親

鍼無妄用務中其邪

肌肉親

視之母有反其真

言邪正脉色必當親切審視若以小作大則反其真矣

刺諸陽

分肉間

盛大實邪多在三陽故宜刺諸陽分肉間

○凡刺小邪日以大補其

不足乃無害

小邪虛邪也虛邪補之則正氣日大而邪自退也不足而補乃可無害若寫其虛斯

不免矣此釋上文小者益陽也

視其所在迎之界遠近盡至其不得外

侵而行之乃自費刺分肉間

迎之界者迎其氣行之所也先補不足之經後寫有

餘之經邪去正復則遠近之真氣盡至邪氣不得外侵則必費散無留矣小邪隨在可刺故但取分肉間也

○凡刺熱邪越而蒼出遊不歸乃無病

越發揚也蒼卒疾也出遊行散

也歸還也凡刺熱邪者貴於速散散而不復乃無病矣此釋上文痺熱消滅也

為開通辟門戶

使邪得出病乃已

開通壅滯辟其門戶以熱邪之宜寫也

○凡刺寒邪日

以溫徐往徐來致其神

溫者溫其正氣也徐往徐來欲和緩也致其神者致其陽氣則

寒邪自除此釋上文寒痺益溫也

門戶已閉氣不分虛實得調其氣存

也

補其虛則門戶閉而氣不泄故虛實可調真氣可存此寒邪之宜溫也

○黃帝曰官鍼

奈何岐伯曰刺癰者用鈹鍼刺大者用鋒鍼刺小者用

員利鍼刺熱者用鑱鍼刺寒者用毫鍼也

五邪之刺官鍼各有所宜

不可不辨九鍼詳義見本類前二

解結推引

靈樞刺節真邪篇○三十五

請言解論與天地相應與四時相副人參天地故可為

解

解論解結之論也人與天地相參應必知其道斯可與言解結矣

下有漸如上生葦

蒲此所以知形氣之多少也

漸如上生葦蒲內外之應理所

皆然人之表裏可察盛衰亦猶是也○漸平聲如音如

陰陽者寒暑也熱則滋雨

而在上根芟少汁人氣在外皮膚緩腠理開血氣減汗

大泄皮淖澤

暑熱則地氣蒸為滋雨而氣在上故草木之氣亦在枝葉而根芟少汁也其於人氣

熱則陽浮在表故血氣減汗大泄然熱則易行故宜於用鍼○芟音該淖乃豹切寒則地凍水

冰人氣在中皮膚緻腠理閉汗不出血氣強肉堅濇當

是之時善行水者不能往冰善穿地者不能鑿凍善用
鍼者亦不能取四厥血脉凝結堅搏不往來者亦未可
即柔故行水者必待天溫冰釋凍解而水可行地可穿
也人脉猶是也

寒則地氣堅凝人氣結聚而經脉難行
即善用鍼者亦不能取四肢之厥逆故

必待天溫冰釋陽氣運行而
後人氣流通乃可用鍼矣

治厥者必先熨調和其經

掌與腋肘與脚項與脊以調之火氣已通血脉乃行然
後視其病脉淖澤者刺而平之堅緊者破而散之氣下
乃止此所謂以解結者也

此治厥之法倘天時未溫而
必欲用鍼則必藉火氣以熨

調其經凡掌腋肘脚項脊之間皆谿谷大節之交會故當熨之溫之則火氣通而血脉行然後視其病脉渾澤者衛氣浮也故可刺而平之堅緊者邪氣實也故當破而散之厥逆除而宗氣下乃可止鍼矣結者邪之所聚刺去其邪即用鍼之類在於調氣氣積於胃以通營衛解結之謂也

各行其道宗氣留於海其下者注於氣街其上者走於

息道

凡用鍼者必在調氣人受氣於穀故氣積於胃然氣義有三曰營氣曰衛氣曰宗氣清者為營營在

脉中濁者為衛衛在脉外故各行其道也宗氣大氣也大氣者留止於上下之氣海其下者蓄於丹田注足陽明之氣街而下行於足其上者積於胃中出於息道而為呼吸凡此三者皆所謂氣當各求其屬而調之者也○按氣街義如衛氣篇曰知六府之氣街者能知解結契結於門戶當與此參閱詳經絡類十二

故厥

在於足宗氣不下脉中之血凝而留止弗之火調弗能

取之

厥者逆也陰寒之氣也厥逆在足則陽道不行故宗氣不下而血脉凝滯不以火溫不能取也用

鍼者必先察其經絡之實虛切而循之按而彈之視其

應動者乃後取之而下之

凡察虛實所驗在氣故必循之彈之視其氣之應手而動

者其微其甚則虛實可知無後用法取之而氣自下矣

六經調者謂之不病雖病

謂自己也

經脉調者雖病亦微故必自己

一經上實下虛而不通者此

必有橫絡盛加於大經令之不通視而寫之此所謂解

結也

一經之脉本相流貫而橫絡盛加於大經則經有不通者矣視而寫之其經則調亦所謂解結也

上寒下熱先刺其項太陽久留之已刺則熨項與肩胛

令熱下合乃止此所謂推而上之者也

上寒下熱者陽虛於上而實於

下也當先刺項間足太陽經大杼天柱等穴久留其鍼而補之仍溫熨肩項之間候其氣至上熱與下相合乃止其鍼此所謂推其上者而使之上也上熱下寒視其虛脉而陷之於經

絡者取之氣下乃止此所謂引而下之者也

上熱下寒者陽實於

上而虛於下也故當視其在下虛陷之經取而補之必使其陽氣下行而後止此引而下之之謂也○按此二節言上下寒熱者非若前節所謂一經上實下虛而不同必有橫絡加於大經之比蓋彼言中有所橫此言本末盛衰也證自大熱偏身狂而妄見妄聞妄言視足不同不可混看

陽明及大絡取之虛者補之血而實者寫之因其偃卧
居其頭前以兩手四指挾按頸動脉久持之卷而切推
下至缺盆中而復止如前熱去乃止此所謂推而散之
者也上文言上下之寒熱所治不同此言徧身之大熱當取足之陽明也蓋陽明經多氣多血為五藏六
府之海故但察其在經在絡或虛或實而取之則徧身之熱可除也然又當因病人之偃卧醫者居其頭之前以兩手大食四指挾其頸中動脉於人迎大迎等處自上而下按而久持之卷而切推之下至缺盆止復如前候其熱去乃已蓋三陽在頭故可獨取人迎而推散其熱也○卷捲同

刺諸風

三十
六

黃帝問曰余聞風者百病之始也以鍼治之奈何

素問骨空

論○風之中人必先皮毛而後及於經絡藏府由淺入深自微而甚善行數變所以為百病之始故聖人之避風如避矢石者岐伯對曰風從外入令人振寒汗出頭正以防其微也

痛身重惡寒

風邪外襲陽氣內拒邪正分爭故振寒風傷衛故汗出邪客三陽故頭痛身重衛傷

則表怯故惡寒

治在風府調其陰陽不足則補有餘則寫

風府督脉

穴察其正氣不足則補之邪氣有餘則寫之

大風頸項痛刺風府風府在上

推上髮際一寸也

大風汗出灸諤諤諤諤在背下俠

脊傍三寸所厭之令病者呼諤諤諤應手

諤諤足太陽經穴厭

之以指按其穴也。乃令病人呼噫。從風憎風刺眉頭。由
謔之聲則應手而動。故即以爲名。於風則憎風。刺眉頭者。足太
陽之攢竹穴也。○憎早登切。

○病風且寒且熱。炆汗出一日數過。先刺諸分理絡脉。

素問長刺節論。○風論曰。風之傷人也。或爲寒熱。或爲
熱中。或爲寒中。或爲癘風。或爲偏枯。或爲風也。即此之
謂。炆汗熱汗也。刺諸分理絡脉者。貴乎多也。○炆居永切。汗出且寒且熱。三日一刺。
百日而已。既汗而復寒熱者。邪盛患深。非可以旦夕除也。故當三日一刺。百日始已。○病大

風骨節重。鬚眉墮。名曰大風。刺肌肉爲故。汗出百日。大

即風論及四時氣篇之所謂癘也。其淺者偏腠理。故當刺肌肉爲故。所以泄陽分之毒風。從汗散也。刺骨

髓汗出百日

刺深者須取骨髓所以泄陰分之風毒也

凡二百日鬚眉生而

止鍼

風毒去盡然後營衛氣復眉髮重生是病已愈方可止鍼矣

○癰風者素刺其腫上已刺以銳鍼鍼其處按出其惡

氣腫盡乃止

靈樞四時氣篇○癰大風也風論曰癰者有營氣熱附其氣不清故使鼻柱壞而色

敗皮膚瘍潰風寒客於脉而不去名曰癰風也其治法當於常素刺其腫上已刺之後又必數以銳鍼鍼其患處仍用手按出其惡毒之氣必待腫盡乃可止鍼蓋毒深氣甚非多刺不可也○癰癰同又音利

常食

方食無食他食

食得其法謂之方食無食他食忌動風發毒等物也

○偏枯身偏不用而痛言不變志不亂病在分腠之間

巨鍼取之益其不足損其有餘乃可復也

靈樞熱病篇
偏枯者半

身不隨風之類也其身偏不用而痛若言不變志不亂則病不在藏而在於分肉腠理之間可用巨鍼取之即

第九鍼也察其虛實以施補寫其元可復矣

○痲之為病也身無痛者四肢

不收

痲亦風屬猶言廢也上節言身偏不用而痛此言身不知痛而四肢不收是偏枯痲病之辨也痲

肥沸

智亂不甚其言微知可治甚則不能言不可治也

智亂不甚其言微有知者神氣未為全去猶可治也神失則無能為矣

病先起於陽後入

於陰者先取其陽後取其陰浮而取之

此治必先其本也病先起於陽

分故當先刺其表浮而取之而後取其陰此下不言先起於陰者蓋病始於陰直中藏也多不可治故不復言

之
○風瘕身反折先取足太陽及臑中及血絡出血中

有寒取三里

瘕強直也身反折反張向後也此風證之在膀胱經者故當取足太陽經穴臑中委

中穴也血絡浮淺之絡也皆當刺出其血若中氣有寒仍當取足陽明之三里溫補胃氣而風寒可除也○瘕

求影切中
原韻音敬

刺灸癲狂

三十
七

目眚外決於面者為銳眚皆在內近鼻者為內眚上為外

眚下為內眚

靈樞癲狂篇○目眚眼角也目之外角曰銳眚目之內角曰內眚此以中外言也若

以上下言之則目之上網亦曰外眚目之下網亦曰內眚○按本篇所論皆癲狂厥逆之病而此節所言目眚

若不相涉者何也蓋以癲狂等疾須察神氣欲察其神當從目始且內皆外皆上綱下綱各有分屬病在何經於此可驗故首及之示人以知所先也。○皆音漬。癲疾始生先不樂頭重痛視

舉目赤甚作極已而煩心候之於顏取手太陽陽明太

陰血變而止

先不樂神志將亂也頭重痛視舉目赤厥氣上行也甚作極已而煩心躁急不寧也

此皆癲疾將作之兆顏天庭也候之於顏邪色必見於此也當取手太陽支正小海手陽明偏歷溫溜手太陰太淵列缺等穴寫去邪血必待其血色變而後止鍼也癲疾始作而引口啼呼喘

悸者候之手陽明太陽左强者攻其右右强者攻其左

血變而止

引口者牽引歪斜也或為啼呼或為喘悸當候於手陽明太陽二經察病所在而刺之穴

如前強堅強也左右牽引病多在絡故左強者當攻右
右強者當攻左必候其血變而止此繆刺之法也○悸
音匱心動也 癰疾始作先反僵因而脊痛候之足太陽陽明

太陰手太陽血變而止

反僵反張僵仆也足太陽之委陽飛陽僕參金門足陽明三里

解谿足太陰隱白公孫等穴皆主之手陽明經穴同前○僵音姜

治癰疾者常與之居

察其所當取之處病至視之有過者寫之置其血於瓠

壺之中至其發時血獨動矣不動灸窮骨二十壯窮骨

者骹骨也

凡治癰疾者須常與之居庶得察其病在何經及當取之處不致謬悞也故必於病至之

時視其有過之所刺出其血以驗其可灸與否瓠壺瓠盧也若前病發而瓠中之血不動者乃可灸之骹骨即

督脉之長强穴。
軀音戶骹音氏

骨癰疾者頤齒諸腠分肉皆滿而骨

居汗出煩惋嘔多沃沫氣下泄不治

骨癰疾者病深在骨也其頤齒諸穴

分肉之間皆邪氣壅閉故為脹滿形則危羸唯骨獨居汗出於外煩悶於內已為危證若嘔多沃沫氣泄於下者尤為脾腎俱敗必不可治。頤音坎又海取切義詳經絡類十三惋美本切又音瞞筋癰疾者

身倦攣急大刺項大經之大杼脉嘔多沃沫氣下泄不

治筋癰疾者病在筋也其身倦急拘攣其脉急大當刺項下足太陽經之大杼穴若上而嘔沫下而泄氣亦

不治之證脉癰疾者暴仆四肢之脉皆脹而縱脉滿盡刺之

出血不滿灸之挾項太陽炎帶脉於腰相去三寸諸分

肉本輸嘔多沃沫氣下泄不治

脈癲疾者病在血脈也暴仆猝倒也縱弛縱也

治此者如脈脹滿則盡刺之以出其血如脈不滿則灸足太陽經挾項之天柱大抒穴又灸足少陽經之帶脉穴此穴相去於腰計三寸許諸分肉本輸謂諸經分肉之間及四肢之輸凡脈縱之所皆當取也若嘔沫泄氣者亦不
癲疾者疾發如狂者死不治
癲病發於陰狂病發於陽故二十難

曰重陽者狂重陰者癲也然陽多有餘故狂發無時其狀疾而暴陰多不足故癲發有期其狀靜而徐此癲狂之辨也今以癲疾而如狂者陽邪盛極而陰之竭也故死不治
○狂始生先自悲也喜

忘苦怒善恐者得之憂饑治之取手太陰陽明血變而

止及取足太陰陽明

此下六節皆言狂病也神不足則悲魂傷則狂忘不精志傷則喜忘

其前言肝乘脾則苦怒血不足則善恐皆得之憂而且
饑致傷藏氣也取手太陰之太淵列缺手陽明之偏歷
溫溜足太陰之隱白公孫足陽明之三裏解谿等穴並可治之必俟其血色變而止鍼也狂始發少

臥不饑自高賢也自辯智也自尊貴也善罵詈日夜不

休治之取手陽明太陽太陰舌下少陰視之盛者皆取

之不盛釋之也

工節言始生病生之初也此節言始發病成而發也其為少臥不饑等候狂病

之發大槩如此手陽明太陽太陰經穴俱如前舌下者
任脉之廉泉也少陰者心經之神門少衝也於此諸經
必視其盛者皆取之若其不盛
則當釋之無論也諸治皆然
狂言驚善笑好歌樂妄

行不休者得之大恐治之取手陽明太陽太陰

恐傷志故為驚

為笑為歌樂妄行也手陽明
太陽太陰穴俱見前第二節
狂目妄見耳妄聞善呼者

少氣之所生也治之取手太陽太陰陽明足太陰頭兩

颞氣衰則神怯所以妄見妄聞而驚呼也手太陽太陰
陽明足太陰經穴俱見前二節四節頭兩颞義亦如

前狂者多食善見鬼神善笑而不發於外者得之有所

大喜治之取足太陰太陽陽明後取手太陰太陽陽明

多食見鬼善笑者以大喜傷神所致難經曰脫陽者
見鬼脫陰者目盲也足太陰太陽陽明穴如前四節手
太陰太陽陽明狂而新發未應如此者先取曲泉左右
穴如前二節

動脈及盛者見血有頃已不已以法取之灸骨骹二十

壯未應如此者謂狂病新起未有如上文五節之見證也宜先取足厥陰肝經之曲泉穴左右皆刺之及諸經之脉有盛者皆出其血有頃病當自已如不已則當照前五節求法以取之仍灸督脉之長強穴二十壯

○病在諸陽脉且寒且熱諸分且寒且熱名曰狂素問長刺

節論。陽盛則為狂病凡病在諸陽分而經脉分肉之間且寒且熱者皆陽邪亂其血氣熱極則生寒也故病為刺之虛脉視分盡熱病已止刺之虛脉謂寫其盛者使之虛也然必視鍼下

諸分盡熱則氣至邪病初發歲一發不治月一發不治月退其病已而止鍼也

四五發名曰癲病陰勝則為癲病歲一發月一發者氣深道遠有宿本也故不易治月四五

發者暴疾耳其來速其去亦速此為可治者也刺諸分諸脉其無寒者以鍼調

之病已止

諸分諸脉刺法如前若其無寒者則癰疾亦有陽邪或瀉或補當用鍼調之也。○按甲乙

經曰刺諸分其脉尤寒者以鍼補之是仍言為陰證

○刺癰驚脉五

素問通評虛實論。五脉如下文。○癰音開癰病

鍼手太陰各

五刺經

刺手太陰之經經渠穴也各五以左右言各五痛也下亦然

太陽五

亦以手太陽經

穴言當是陽谷穴

刺手少陰經絡傍者一

手少陰之經穴靈臺也在絡穴通里之傍

故曰絡傍者一足陽明一

亦言經穴解絡也

上踝五寸刺三鍼

足少陽膽經之

絡光明穴也三鍼即三痛

腎主水水俞五十七穴

三十

黃帝問曰少陰何以主腎腎何以主水岐伯對曰腎者至陰也至陰者盛水也肺者太陰也少陰者冬脉也故其本在腎其末在肺皆積水也

素問水熱穴論○腎應北方之氣其藏居下故

曰至陰也水王於冬而腎主之故曰盛水也肺為手太陰經其藏屬金腎為足少陰經其藏屬水少陰脉從腎上貫肝膈入肺中所以腎邪上逆則水客於肺故凡病水者其本在腎其末在肺亦以金水相生母子同氣故皆能帝曰腎何以能聚水而生病岐伯曰腎者胃之關

也關門不利故聚水而從其類也

關者門戶要會之處所以司啓閉出入也

腎主下焦開竅於二陰水穀入胃清者由前陰而出濁者由後陰而出腎氣化則二陰通腎氣不化則二陰閉

腎氣壯則二陰調腎氣虛則二陰不禁故曰腎者胃之
關也關閉則氣停氣停則水積水之不行氣從乎腎所
謂從其類也○愚按本節云關門不利則聚水而從其
類者言關之不通也脉要精微論曰倉廩不藏是門戶
不要也水泉不止是膀胱不藏也得守者生失守者死
言關之不固也不通則癰閉而肘腫不固則滑泄而脫
元職此之由總因腎敗夫胃為五藏六府之海而關則
在腎關之為義操北門鎖鑰之柄凡一身元氣消長約
束攸賴故許知可云補脾不若補腎者謂救上下溢於
本之道莫先乎此也誠萬古不易之良法

皮膚故為肘腫肘腫者聚水而生病也

肌膚浮腫曰肘腫脾主肌肉足

太陰也寒水侮之故反聚水而生病

帝曰諸水皆生於腎乎岐伯曰腎者牝

藏也地氣上者屬於腎而生水液也故曰至陰

牝陰也地氣上

者陰氣升也以陰從陰而生水液故曰至陰

勇而勞甚則腎汗出腎汗出逢

於風內不得入於藏府外不得越於皮膚客於玄府行

於皮裏傳為胛腫本之於腎名曰風水

勇而勞甚者汗自陰分深處而

發故曰腎汗汗出逢風則腠理閉內已離於藏府外不得泄於皮膚故客於玄府而為胛腫此則因水因風故

名風

所謂玄府者汗空也

汗屬水水色玄汗之所居故曰玄府從孔而出故曰汗空

然汗由氣化出乎玄微是亦玄府之義。空孔同

帝曰水俞五十七處者是何

主也岐伯曰腎俞五十七穴積陰之所聚也水所從出

入也

凡此五十七穴者皆積陰之所聚水尻上五行行所從出入者也腎主水故皆曰腎俞

五者此腎俞

膀胱經上五行者中行督脈也傍四行足太陽

命門懸樞脊中也次二行各五穴白環俞中膂內俞膀胱俞小腸俞大腸俞也又次二行各五穴秩邊胞育志室盲門胃倉也五行共二十五穴皆在下焦而主水故皆曰腎俞

故水病下為臍腫大

腹上為喘呼不得臥者標本俱病

水之本在腎標在肺標本俱病故在下則

為臍腫大腹在上故肺為喘呼腎為水腫肺為逆不得

臥肺主氣水在上則氣不化故肺為喘呼腎主水水在下則濕不分故腎為水腫然病水者必自下而升上

及於肺其病劇矣故分為相輸俱受者水氣之所留也

肺為逆不得臥也言水能分行諸氣相為輸應而俱受病者正以水氣伏

菟上各二行行五者此腎之街也

伏菟足陽明經穴伏菟之上即腹部也腹

部之脉任居中行左右各二夾臍旁兩行者足少陰並衝脉氣所發行各五穴則橫骨大赫氣穴四滿中注是也次外二行者足陽明經所行行各五穴則氣衝歸來水道大巨五陵是也左右共二十穴此皆水氣往來之道路故為

腎之街也

三陰之所交結於脚也踝上各一行行六穴

此腎脉之下行也名曰太衝

三陰肝脾腎三經也三陰所交俱結於脚故足太陰

有三陰交穴踝上各一行獨指足少陰腎經而言行六穴則大鍾照海復溜交信築賓陰谷是也左右共十二穴腎之大絡並衝脉下行凡五十七穴者皆藏之陰絡於足合而盛大故曰太衝

水之所客也

右共五十七穴皆藏之陰絡為陰氣之所行故治水者當察而取之

○風疥膚脹為五十七疳取皮膚之血者盡取之

靈樞四時

氣篇○疥水同風水膚脹五十七疳義俱如前若皮膚之有血絡者亦當盡取去之○徒疥先取

環谷下三寸以鉋鍼鍼之已刺而筭之而內之入而復

之以盡其疥必堅來緩則煩惋來急則安靜間日一刺

之疥盡乃止

此泄水之法也徒但也有水無風故曰徒水環谷義無所考或即足少陽之環跳穴

其下三寸許垂手着股中指盡處惟奇穴中有風市一穴或者即此明者察之鉋鍼第五鍼也筭箭室也已刺

而筭之而內之入而復之以盡其疥謂用鍼如箭之歸筭出入頻復開通其道以盡其疥也然疥在膚中其候

必堅若鍼後水來遲緩則必煩悶若來急速則必安靜矣仍須間日一刺以水盡而止○按鍼要曰凡水氣惟

得鍼水溝若鍼餘穴水盡即死是飲閉藥方刺之時徒

又不可不知也

鍼音披 音勇

飲之

凡患水病者小便多不利既已刺治如前仍須飲通閉之藥以拔其本即方刺之時亦但飲無碍也

方飲無食方食無飲

藥食不宜相混混則難於取効

無食他食百三十

五日

水腫既消當忌傷脾發濕等物至一百三十五日之外方保其不復矣

熱病五十九俞

素問水熱穴論○三十九

帝曰夫子言治熱病五十九俞余論其意未能領別其

處願聞其處因聞其意

治熱之法本有不岐伯曰頭上同故欲并聞其意

五行行五者以越諸陽之熱逆也

頭上五行者督脉在中傍四行足太陽經

也中行五穴上星顙會前項百會後頂也次兩傍二行各五穴五處承光通天絡却玉枕也又次兩傍二行各五穴臨泣目窓正營承靈腦空也五行共二十五穴俱在顙項之上故可散越諸陽熱氣之逆於上者大

杼膺俞缺盆背俞此八者以寫胃中之熱也

大杼足太陽經穴膺

俞中府也手太陰經穴缺盆足陽明經穴背俞風門也一名熱府此八穴皆在胃之前後故可寫胃中之熱

氣街三里巨虛上下廉此八者以寫胃中之熱也

氣街三里

巨虛上廉下廉此八者俱足陽明經穴故可寫胃中之熱

雲門髃骨委中髓空此八

者以寫四支之熱也

雲門手太陰經穴髃骨即肩髃手陽明經穴委中足太陽經穴髓空

即腰俞督脉穴雲門髃骨連手委中髓空連足故此八穴可寫四支之熱○空孔同

五藏俞傍五

此十者以寫五藏之熱也

五藏俞傍五穴肺俞之傍魄戶也心俞之傍神堂也肝俞

之傍魂門也脾俞之傍意舍也腎俞之傍志室也皆足太陽經穴凡五藏之繫咸附於背故此十者可寫五藏

之凡此五十九穴者皆熱之左右也

又五十九穴詳後篇帝曰人

傷於寒而傳為熱何也岐伯曰夫寒盛則生熱也

寒邪外束

則陽氣內鬱故傳而為熱所以寒盛則生熱也然則外感發熱者因傷於寒也散其寒則陽氣泄而熱自除矣今有不知標本者但見發熱輒用苦寒夫陰寒沉滯焉能解表表不解則熱愈甚所以輕者致重重者致危是不知熱無犯熱寒無犯寒之戒也詳義見運氣類二十並當詳究

諸熱病死生刺法

靈樞熱病篇○四十

熱病三日而氣口靜人迎躁者取之諸陽五十九刺以

寫其熱而出其汗實其陰以補其不足者

此下所言熱病即傷寒時

疫也熱病三日邪猶居表若氣口靜而人迎躁者正病在三陽而未入陰分故當取諸陽經為五十九刺以寫陽邪之實仍補三陰之不足也五十九刺法如下丈人迎脉口一盛二盛三盛當補當寫詳義出終始篇見本類前二身熱甚陰陽皆靜者勿刺也其可刺者急取之十八

不汗出則泄所謂勿刺者有死徵也

身熱甚而陰陽之脉皆靜者陽證得

陰脉也故不宜刺若察其可刺者當急取之雖不汗出則邪亦從而泄矣此言勿刺者以其脉證相反有死徵也下文熱病七日八日脉口動喘而弦者急刺之汗且

皆然

自出淺刺手大指間

熱病七八日邪必深至陰分故脉口之脉當動疾如喘而且弦宜急

刺手太陰肺經則汗自出而邪可散矣然刺此者宜淺手大指間即少商穴也。○弦一本作短熱病七

日八日脉微小病者溲血口中乾一日半而死脉代者

一日死

熱病七八日脉微小者正氣虛也溲血口中乾者傷其陰也皆為死證若脉來變亂失常是為

代脉其尤促

熱病已得汗出而脉尚躁喘且復熱勿刺膚喘

甚者死

熱病已得汗邪當退矣若脉尚躁氣尚喘身復熱者是謂不為汗衰乃反證也故勿刺其膚刺

而重傷其氣若喘甚者則必死也

熱病七日八日脉不躁躁不散數後

三日中有汗三日不汗四日死未曾汗者勿腠刺之

凡熱

病七日之後邪欲解散者脉必躁盛乃為將汗之兆今熱病七日八日而脉猶不躁則陰之類也即有躁意而力不散大至不數疾皆正氣衰微不能鼓動亦陰之類也必且未能解散故當再俟三日庶得有汗若三日不汗又逾四日則病在旬日外矣陰陽不應期當死也凡若此者既不能汗其氣必虛故勿為膚腠之刺

熱病先膚痛窒鼻充面取之皮以第一鍼五十九苛軫鼻

索皮於肺不得索之火火者心也

熱病先膚痛窒塞於鼻充浮於面者邪在膚

腠肺經病也刺宜淺取皮分故當用第一鍼曰鑱鍼者以刺五十九穴之皮部也苛深也軫車之前後兩端橫木也言鼻窒之甚內外不通亦猶軫之橫塞也皆屬於肺肺屬金其合在皮故但求之於皮即所以求於肺也如刺此而不得效則當求之於火火者心也補心之熱脉益陽氣以制金邪則肺熱當自退耳○窒音只

病先身濇倚而熱煩惋乾脣口噍取之脉以第一鍼五

十九膚脹口乾寒汗出索脉於心不得索之水水者腎

也濇燥濇也倚身無力也兼之熱而煩悶脣口與噍俱乾者邪在血脉心經病也故當用鍼之第一曰鑱鍼

者以取五十九穴之脉分也膚脹口乾寒汗出亦皆脉之為病心屬火其合在脉故但求之於脉即所以求於心也若求於脉而不得效則當求之於水水者腎也補腎氣於骨則水王足以制火而心熱自退矣○惋母本

切熱病噍乾多飲善驚臥不能起取之膚肉以第六鍼

五十九目眦青索肉於脾不得索之木木者肝也熱病

多飲善驚悸支體倦怠臥不能起者邪在膚肉脾經病也當用第六鍼曰員利鍼者以取五十九穴之肉分也

若目眚青者正以水氣乘土亦為脾病脾屬土其合在肉故但求之於肉即所以求於脾也若求脾而不得效者則當求之於木木者肝也補肝筋之氣則木能勝土而脾熱當自平矣○噍音益 熱病面青腦

痛手足躁取之筋間以第四鍼於四逆筋臂目浸索筋

於肝不得索之金金者肺也熱病面青肝色見也腦痛

也手足躁者肝之榮在爪木病在四末也皆肝經之病故當取之筋結之間用第四鍼曰鋒鍼者以寫其四逆等證四逆者肝邪盛而四支厥也筋臂者足不能行也目浸者淚出不收也皆為肝病肝屬木其合在筋故但求之於筋即所以求於肝也若求肝不得其效則當求之於金金者肺也補肺之氣則金能勝水而肝熱可平矣○雙 熱病數驚癰癰而狂取之脉以第四鍼急寫有音壁

餘者癰疾毛髮去索血於心不得索之水水者腎也

熱病

數驚心邪盛也癰癰者熱極生風陰血傷也狂則熱之甚矣皆心經病也故當取之於脉用第四鍼曰鋒鍼者急寫其有餘之邪若陽極陰虛而病癰疾髮為血餘故毛髮亦去病主乎心心屬火其合在血脉故但求之於血即所以求於心也若求心而不得其效則當求之於水水者腎也補腎之水可以制火真陰自復矣○癰熾

寄係三音
癰音縱

熱病身重骨痛耳聾而好瞑取之骨以第四

鍼五十九刺骨病不食齧齒耳青索骨於腎不得索之

土土者脾也

身重骨痛耳聾好瞑皆腎經之病病在陰則目瞑故當取之於骨用第四鍼曰鋒鍼

者以刺五十九穴之骨分也其不食者陰邪盛也齧齒者齒為骨之餘也耳青者腎之竅也皆為腎病腎屬水

其合在骨故但求之於骨即所以求於腎也若求腎而不得效者則當求之於土土者脾也補脾氣之肉分則土能勝水而腎邪可平矣○齧音孽咬也

熱病不知所痛耳聾不能自收口

乾陽熱甚陰頗有寒者熱在髓死不可治

凡熱病有痛而不得其所

耳聾寂無所聞體重不能收持口液乾涸值陽勝之時則熱甚陰勝之時頗有寒者此以邪居陰分熱深在髓乃死證也熱病頭痛顛顛目瘳脉痛善衄厥熱病也取之以

第三鍼視有餘不足寒熱瘳

顛顛即足少陽腦空穴一曰鬢骨也目瘳脉痛目脉

抽掣而痛也衄鼻血也厥熱病熱逆於上也取以第三鍼鍼鍼也視有餘不足察所病之經脉虛實而為補寫也寒熱瘳三字於上下文義不相續似為衍熱病體重

腸中熱取之以第四鍼於其膺及下諸指間索氣於胃

絡得氣也

脾主肌肉四支邪在脾故體重
大腸小腸皆屬於胃邪在胃則腸中熱故當用第四鍼曰

鋒鍼者取脾胃二經之膺曰太白曰陷谷也及下諸指間者謂在足諸膺也下文曰五指間各一凡八痛足亦如是者其義即此索氣於胃絡得氣者陽明之絡曰豐隆別走太陰故取此可以得脾氣絡當作絡熱病

挾臍急痛胃脇滿取之湧泉與陰陵泉取以第四鍼鍼

噤裏

挾臍急痛足少陰腎經所行也胸脇滿足太陰脾經所行也故在少陰則取湧泉在太陰則取陰陵

泉用第四鍼曰鋒鍼者刺之鍼噤裏者以少陰太陰之脈俱上絡咽噤即下文所謂廉泉也

熱病而

汗且出及脈順可汗者取之魚際太淵大都太白寫之

則熱去補之則汗出汗出大甚取內踝上橫脉以止之
熱病陽氣外達脉躁盛者汗且出也陽證得陽脉者脉
之順也皆為可汗當取手太陰之魚際太淵足太陰之
大都太白寫之則熱可去補之則汗可出也若汗出太
甚則當取內踝上橫脉即脾經之三陰交也寫之則汗
自止矣上三節所言胃脘湧泉陰陵泉魚際太淵大都
內踝上橫脉凡十四穴皆不在下文五十九穴之數內
者故特表見於此也。按寒熱病篇曰病始手臂者先
取手陽明太陰而汗出病始頭首者先取項太陽而汗
出病始足脛者先取足陽明而汗出臂太陰可汗出足
陽明可汗出故取陰而汗出甚者止之於陽取陽而汗
出甚者止之於陰其義尤精雖彼為刺癰之法然熱病
與此節有相須之用所當參閱詳本類後五十四熱病
已得汗而脉尚躁盛此陰脉之極也死其得汗而脉靜

者生

熱病已得汗則邪當退脉當靜矣若汗後脉尚躁

乃為逆證若汗後即脉靜者邪去正復也乃為順證得逆者死得順者生

熱病者脉尚盛躁

而不得汗者此陽脉之極也死脉盛躁得汗靜者生

熱病

脉尚躁盛者必當邪解汗出也若脉雖盛而汗不得出以陽脉之亢極而陰虛不能外達也故死若得汗而靜則為順證故生○按此二節一曰陰極一曰陽極義若有二然脉之躁盛者皆陽勝之候也汗者液之所化其發在陽其原在陰也若既得汗而脉猶躁盛者以陽無所歸由陰虛也脉躁盛而汗不得出者以陰竭於中亦陰虛也故脉之盛與不盛當責之陽汗之出與不出當責之陰觀本神篇曰陰虛則無氣無氣則死矣其所重者正此陰字陰為生氣之本無根則氣脫故必死也

○熱病不可刺者有九一曰

汗不出大顴發赤噦者死

不可刺者以其有死徵也汗不得出陰無力也大顴發赤

謂之戴陽面戴陽者陰不足也噦者邪犯陽明胃虛甚也本原虧極難乎免矣○噦於決切又音晦

二曰

泄而腹滿甚者死

泄則不當脹滿况其滿甚以邪傷太陰脾氣敗也故死

三曰目

不明熱不已者死

五藏六府之精氣皆上注於目而為之精目不明者藏府之精氣竭也熱

不已者表裏之陰氣竭也故死

四曰老人嬰兒熱而腹滿者死

熱而腹滿邪傷

脾藏也老人嬰兒元以脾氣為本故犯之者死

五曰汗不出嘔下血者死

汗不出者

陰之虧也再或嘔而下血陰傷元甚故死

六曰舌本爛熱不已者死

心肝脾腎之脉

皆繫於舌本舌本爛加之熱不已者三陰俱損也故不免於死七曰欬而衄汗不出

不至足者死

欬而且衄邪在肺經動陰血也汗不出或出不至足尤為真陰潰竭故死

髓熱者死

髓者至陰之精骨之充也邪入最深乃為髓熱腎氣敗竭故死九曰熱而瘕

者死腰折瘕瘕齒噤齱也

瘕風強病也凡脊背反張曰腰折肢體抽掣曰瘕瘕牙關

不開曰噤切齒曰齱即皆瘕之謂也此以熱極生風大傷陰血而然既熱且瘕乃為死證○瘕音敬瘕翅寄係

三音瘕音縱噤求禁切齱音械

凡此九者不可刺也

刺之無益必反招嫌故皆不可刺也

○所謂五十九刺者兩手外內側各三凡十二痛

此下詳明

五十九刺之穴也兩手外內側即太陽之少澤少陽之關冲陽明之商陽也三陰俱在內側即太陰之少商厥陰之中冲少陰之少中也左右共十二穴痛刺五指間瘡也有刺必有瘕故即以痛為數○痛委偉二音

各一凡八痛足亦如是

五指間者總言手五指也各一者本節之後各一穴也觀上文

第十五節云取之於其腧及下諸指間正謂此也蓋諸經腧穴皆在指之本節後如手經則太陽之後谿少陽之中渚陽明之三間獨少陰之在本節後者則少府之榮也手之六經惟太陰厥陰則本節後俱無穴故左右四經凡八痛也其在足經之腧則太陽曰束骨少陽曰臨泣陽明日陷谷太陰曰太白皆在本節之後其少陰之脉不行於指厥陰之脉則本節後亦無穴左右四經止共八穴故曰足亦如是

頭入髮一寸

傍三分各三凡六痛

頭入髮一寸即腎脉上星之次其傍穴分而為三則足太陽之五處

承光通天也左右各三故凡六痛

更入髮三寸邊五凡十痛

更入髮者自上星之

次向後也三寸邊五者去中行三寸許兩邊各五也即足少陽之臨泣目窓正營承靈腦空左右二行凡十痛

耳前後口下者各一項中一凡六病

耳前者聽會也耳後者完骨也俱足

少陽經穴各二口下者任脉之承漿也一巔上一百會

穴項中者督脉之瘞門也一穴共凡六病廉泉

一任脉風池二天柱二風池足少陽經穴天柱足太陽

十九俞也前篇水熱穴論所載者亦熱病五十九俞也考二篇之異同則惟百會顛會五處承光通天臨泣目窻正營承靈腦空等十八穴相合其餘皆異然觀本篇所言者多在四肢蓋以寫熱之本也水熱穴論所言者多隨邪之所在蓋以寫熱之標也義自不同各有取用且本經靈樞在前素問在後後者所以補前之畧耳故皆謂之熱病五十九俞非謬異也今總計二篇之數再

者凡十四穴仍除去重複十八穴則總得一百一十四穴
皆熱俞也均不可廢凡刺熱者當總求二篇之義各隨其
宜而取用之庶乎
盡刺熱之善矣

刺寒熱

四十

皮寒熱者不可附席毛髮焦鼻槁脂不得汗取三陽之絡

以補手太陰

靈樞寒熱病篇。肺主皮毛開竅於鼻皮寒熱者邪在外故畏於近席而毛髮焦鼻槁脂

也如不得汗當寫足太陽之絡穴飛陽補手太陰之魚際太淵蓋太陽即三陽主在表之熱而臂之太陰可以取汗

也。腊音昔乾也

肌寒熱者肌痛毛髮焦而脣槁脂不得汗取三

陽於下以去其血者補足太陰以出其汗

脾主肌肉其榮在脣肌寒熱者

邪在脾故當肌痛毛髮焦而脣槁腊也取三陽法如骨寒
上文補足太陰之大都太白可以出汗義見前章

熱者病無所安汗注不休齒未槁取其少陰於陰股之絡

齒已槁死不治骨厥亦然

腎主骨骨寒熱者邪在至陰也陰虛者必躁故無所安也

陰傷則液脫故汗注不休也齒者骨之餘若齒未槁者陰氣尚充猶為可治當取足少陰之絡穴大鍾以刺之若齒有枯色則陰氣竭矣其死無疑近以愚見則不獨在齒凡爪枯者亦危候也骨寒而厥者皆然

○陰刺入一傍四處治寒熱

素問長刺節論○陰刺疑誤按官鍼篇云

五曰揚刺揚刺者正內一傍內四以治寒氣之博大者也十曰陰刺陰刺者左右率刺之以治寒厥此云陰刺者當是揚刺深專者刺大藏深專者邪氣深而專在一詳本類前五藏也治當求其大藏而直

取之凡五藏
皆為大藏

迫藏刺背背俞也

欲迫取其大藏之氣當刺其背以五藏之俞在

也

於背刺之迫藏藏會

刺背俞而能迫藏者為藏氣之所會也

腹中寒熱去

而止

刺背俞者無問其數必使腹中寒熱去而後止鍼

與刺之要發鍼而淺出

血

言凡與刺藏俞者不宜出血太多其要在發鍼淺而少出其血也

炎寒熱

素問骨空論
○四十二

炎寒熱之法先灸項大椎以年為壯數

此下炎寒熱之法多以虛勞為

言然當因病隨經而取之也大椎督脉穴灸如患者之年數

次灸擗骨以年為壯數

尾盡之穴曰擗骨任脉穴也○擗音厥

視背俞陷者灸之

背俞皆足太陽經穴陷下之處

即經氣之不足者故當灸之

舉臂肩上陷者灸之

肩髃也手陽明經穴

兩季脇

之間灸之

足少陽京門穴也

外踝上絕骨之端灸之

足少陽陽輔穴也

蹠切足小指次指間灸之

足少陽俠谿穴也

腓下陷脉灸之

足太

陽承山穴也

外踝後灸之

足太陽崑崙穴也

缺盆骨上切之堅

動如筋者灸之

此結聚也但隨其所有而灸之不必拘於俞穴

膺中陷骨間灸

之任脉之天突穴也

掌束骨下灸之

手少陽陽池穴也

臑下關元三寸

灸之

任脉之關元穴在臑下三寸

毛際動脉灸之

足陽明氣衝穴也

膝下三

寸分間灸之

足陽明三里穴也

足陽明跗上動脉灸之

衝陽穴也 巔

上一灸之

督脉之百會穴也

犬所嚙之處灸之三壯即以犬傷

病法灸之

犬傷令入寒熱者古有灸法如此故云然也。○醬尼結切

凡當灸二十九

處

自犬嚙之上共計二十九處犬傷者無定所故不在數內

傷食灸之

傷食而發寒熱者如上法

求陽明經
灸之

不已者必視其經之過於陽者數刺其俞而

藥之

過於陽者陽邪之盛者也刺可寫其陽藥可調其陰灸之不已當變其治法如此

刺頭痛

靈樞厥病篇
○四十三

厥頭痛面若腫起而煩心取之足陽明太陰

厥逆也邪逆於經上

千頭腦而為痛者曰厥頭痛也下放此足陽明之脉上行於面其悍氣上衝頭者循眼系入絡腦足太陰支者

注心中故以頭痛而兼面腫煩
心者當取足之陽明太陰也

厥頭痛頭脉痛心悲善

泣視頭動脉反盛者刺盡去血後調足厥陰

頭脉痛者痛在皮肉

血脉之間也心悲善泣者氣逆在肝也故當先視頭脉
之動而盛者刺去其血以泄其邪然後取足厥陰肝經
而調補之以肝脉會於巔也

厥頭痛貞貞頭重而痛寫頭上五行行

五先取手少陰後取足少陰

貞貞堅固貌其痛不移也頭上五行行五即前篇熱

病五十九俞之穴所以散諸陽之熱逆也先取手少陰
心經寫南方以去火也後取足少陰腎經補北方以壯

水厥頭痛意善忘按之不得取頭面左右動脉後取足

太陰

脾藏意意傷則善忘陽邪在頭而無定所則按之
不得故當先取頭面左右動脉以泄其邪後取足

太陰經以補脾氣也

厥頭痛項先痛腰脊為應先取天柱後取足

太陽

項先痛腰脊為應皆足太陽經也故當先取天柱後及本經之下膂

厥頭痛頭痛甚

耳前後脉湧有熱寫出其血後取足少陽

耳之前後足少陽經也其

脉湧而熱者當寫出熱血仍取本經之穴。有熱一本云有動脉

真頭痛頭痛甚腦盡

痛手足寒至節死不治

頭痛有二上文言厥頭痛者可治此言真頭痛者不可治蓋頭

為諸陽之會四支為諸陽之本若頭痛甚而徧盡於腦手足寒至節者以元陽敗竭陰邪直中髓海故最為凶

兆頭痛不可取於膂者有所擊墮惡血在於內若肉傷

痛未已可則刺不可遠取也

頭痛因於擊墮者多以惡血在脉絡之內故傷痛未

已若可刺者但當刺去其痛處之血不可頭痛不可刺者遠取榮膈徒傷正氣蓋此非大經之病也

大痺為惡日作者可令少愈不可已

痺之甚者謂之大痺其證則風寒濕

三氣雜至合成惡患令人頭痛不可刺也若日作者則猶有間止故刺之可令少愈終亦不能全已也頭

半寒痛先取手少陽陽明後取足少陽陽明

者頭半寒痛者偏頭冷

痛也手足少陽陽明之脉皆循耳上行頭角故當先取手經以去其標後取足經以去其本也

刺頭項七竅病

四十

刺家不診聽病者言

素問長刺節論○善刺者不必待診但聽病者之言則發無不中此

以得鍼之神者為言非謂刺家槩不必診也今後世之士鍼既不精又不能診則虛實補瀉焉得無悞故九鍼

十二原篇又曰凡將用鍼必先診脉視氣之劇易乃可以治其義為可知矣

在頭頭疾痛為

藏鍼之

藏鍼之藏言裏也即深入其鍼之謂

刺至骨病已上無傷骨肉及

皮皮者道也

頭疾痛者其病深故當刺至骨分則病已然既刺至骨何得上無傷骨肉及皮乎蓋

謂無得妄施補寫謬傷骨肉皮分之氣也不過借皮肉為入鍼之道耳

○頸側之動脉人迎人迎足陽明也在嬰筋之前

寒靈樞

病篇○頸前中行任脉也二行動脉即足陽明之

人迎穴說文曰嬰頸飾也故頸側之筋曰嬰筋

之後手陽明也名曰扶突

在頸之第三行

次脉足少陽脉也名

曰天牖

在頸之第六行手少陽脉也足字疑悞○牖音有

次脉足太陽也名曰

天柱

在頸第七行

腋下動脈臂太陰也名曰天府

臂太陰即手太陰也

以上五穴本輸篇言之尤詳見經絡類第十即所以治下文之病者也

陽迎頭痛胃滿不

得息取之人迎

迎逆也陽邪逆於陽經而為頭痛胃滿者當取之人迎也

暴瘧氣鞭

取扶突與舌本出血

瘧聲瘧不能言也氣鞭喉舌強鞭也當取手陽明之扶突穴及其

舌本之血凡言暴者皆一時之氣逆非宿病也故宜取此諸穴以治其標○瘧音音鞭硬同

暴聾氣

蒙耳目不明取天牖

經氣蒙蔽而耳目暴有不明者當取天牖如上文也

暴瘰癧

眩足不任身取天柱

瘰癧拘攣也瘰癧瘰也眩暈也合三證而足弱不能任身者當取天

柱如上文也

暴瘰內逆肝肺相搏血溢鼻口取天府

瘰癧熱

瘰音閑

病也暴熱內逆則肝肺之氣相搏而血溢口鼻此為天
當取天府如上文也。瘡音丹又上去二聲

牖五部

此總結上文五穴為天牖五部者以天牖居中統前後上下而言也

○臂陽明有

入頰徧齒者名曰大迎下齒齠取之臂惡寒補之不惡

寒寫之

手陽明脉有入頰徧齒者其道出於足陽明之大迎凡下齒齠痛者當取之如商陽二間三間

皆主齒痛但臂惡寒者多虛故宜補不惡寒者多實故宜寫。頰音求齠也齠曲主切

○足太陽

有入頰徧齒者名曰角孫上齒齠取之在鼻與頰前方

病之時其脉盛盛則寫之虛則補之

足太陽脉亦有入頰徧齒者其道出

於手少陽之角孫凡上齒齠痛者當取之又如鼻與頰前者乃足陽明地倉巨窳等穴亦主齒痛以足陽明入

上齒中也但當於方病之一曰取之出鼻外

謂手陽明

未窅迎香

時察其盛衰而補寫之

等穴○足陽明有挾鼻入於面者名曰懸顙屬口對入繫

目本視有過者取之損有餘益不足反者益其

甚足陽

明之脉有挾鼻入於面者道出於足少陽之懸顙其下行者屬於口其上行者對口入繫目本或目或口凡有過者皆可取之然必察其有餘不足○足太陽有通項入足以施補寫若反用之病必益甚

於腦者正屬目本名曰眼系頭目苦痛取之在項中兩

筋間

足太陽之脉有通項入於腦者即項中兩筋間玉枕穴也頭目痛者當取之

入腦乃別

陰蹻陽蹻陰陽相交陽入陰陰出陽交於目銳眥陽氣

盛則瞋目陰氣盛則瞑目

太陽經自項入腦乃別屬陰

睛明穴陽蹻氣盛則陰氣不榮故目瞑而不能開也。按脉度

陰蹻氣盛則陽氣不榮故目瞑而不能開也。按脉度

篇言蹻脉屬目內眥合於太陽下文熱病篇曰目中赤

痛從內眥始取之陰蹻然則此云蹻眥者當作內眥也

詳經絡類二十八。蹻有五音蹻皎喬

脚又極虐切瞋音瞋瞑音明又上聲

者治其喉中央在缺盆中者素問骨空論。謂氣喘急

兩缺盆之中任其病上衝喉者治其漸漸者上俠頤也

脉之天突穴也

氣喘滿而上衝於喉者當治足陽明經俠頤之大

迎穴陽明之脉由此漸上頤面故名俠頤為漸也

枕在肩上橫骨間失枕者風入頸項疼痛不利不能就

枕也刺在肩上橫骨間當是後肩骨

頤經

三十六

上手太陽之肩外俞也或為足少陽之肩井穴亦主頸項之痛若王氏云缺盆者其脉皆行於前恐不可以治也
失折使榆臂齊肘正灸脊中折痛如折也榆當作掄引也謂使病者引臂下齊肘

端以度脊中乃其當灸之處蓋即督脉之陽關穴也

○喉痺舌卷口中乾煩心心痛臂內廉痛不可及頭取

手小指次指爪甲下去端如韭葉

靈樞熱病篇○小指次指端手少陽之關

也○目中赤痛從內眥始取之陰蹻

陰蹻之脉屬於目內眥足少陰之照

海即陰蹻之所生也故當刺之

○耳聾無聞取耳中

靈樞厥病篇○耳中手太陽之聽宮也

○耳鳴取耳

前動脉

耳前動脉手少陽之耳門也

○耳痛不可刺者耳中有膿若

有乾盯瞤耳無聞也

盯瞤耳垢也若耳中有膿及有乾盯瞤而或痛或無聞者皆不可刺

之膿垢去而耳自愈矣

○耳聾取手小指次指爪甲上

與肉交者先取手後取足

手小指次指爪甲上者手少陽之關冲也後取足者亦言

小指次指足少陽之竅陰也

○耳鳴取手中指爪甲上左取右右取

左先取手後取足

手中指爪甲上手厥陰之中衝也左鳴者取其右右鳴者取其左

○聾而不痛者取足少陽聾而痛者取手陽明

靈樞雜病篇

足少陽之脉下耳後支耳中出耳前手陽明之別者入耳故當分痛與不痛而補寫之

○噤乾口

中熱如膠取足少陰

足少陰之脉循喉嚨繫舌本蓋乾口熱如膠者陰不足也故當取而

補之

蓋音益

○喉痺不能言取足陽明能言取手陽明

手足陽明

之脉皆循喉嚨能言者輕但取之上不能言者重當寫其下也

○齒痛不惡清飲取足

陽明惡清飲取手陽明

手足陽明之脉皆入齒中然胃經多實熱故不畏寒飲者當寫

足陽明大腸經多虛寒故畏寒飲者當補手陽明也此與上文臂陽明節義有所闕當互求之○青音倩

衄而不止衄血流取足太陽衄血取手太陽不已刺宛

骨下不已刺膻中出血

鼻中出血曰衄敗血凝聚色紫黑者曰衄衄血成流其去多也

下云衄血其聚而不流者也血去多者當取足太陽去少者當取手太陽宛骨下即手太陽之腕骨穴膻中出

血即足太陽之委中穴也
○ 蚘女六切 衄普杯切

○ 顙痛刺手陽明與顙之盛

脉出血

顙鬢前兩太陽也手陽明之別者入耳合於宗脉正出兩顙之間故當刺之與顙之盛脉出血

即鬢前之血絡
顙音坎又海敢切

顙痛刺足陽明曲周動脉見血立已

不已按人迎於經立已

足陽明之脉循頰車上耳前過客主人循髮際至額顙故顙痛

者當刺曲周即頰車也以其周繞曲頰故曰曲周見血立已如不已當按人迎於本經而淺刺之可立已也

○ 項痛不可俛仰刺足太陽不可以顙刺手太陽也可

俛仰者痛在項後故當刺足太陽經不可
以顙者痛在頸側故當刺手太陽經也

○ 重舌刺舌柱以鉞鍼也

靈樞終始篇○ 舌下生小舌謂之重舌舌柱即舌下之筋

如柱者也常用第五鍼曰
鉞鍼者刺之○鉞音披

卒然失音之刺

靈樞憂恚無言
篇全○四十五

黃帝問於少師曰人之卒然憂恚而言無音者何道之

塞何氣出行使音不彰願聞其方

恚恚畏二
音恨怒也

少師答曰

咽喉者水穀之道也喉嚨者氣之所以上下者也

人有二喉

一軟一鞣軟者居後是謂咽喉乃水穀之道通於六府者也鞣者居前是謂喉嚨為宗氣出入之道所以行呼

吸通於五藏者也其在大陰陽明論則單以軟者會厭為咽鞣者為喉故曰喉主天氣咽主地氣○鞣硬同

會厭

者音聲之戶也

會厭者喉間之薄膜也周圍會合上連懸雍咽喉食息之道得以不亂者賴其

遮厭故謂之會厭能開能

口脣者音聲之扇也

脣啟則聲揚故

謂之

舌者音聲之機也

舌動則音生

懸雍垂者音聲之

關也

懸雍垂者懸而下垂俗謂之小舌當氣道之衝為喉間要會故謂之關

頤頤者分氣

之所泄也

頤頤也頤頤即頤中之喉頤當咽喉之上懸雍之後張口可見者也頤前有竅息通於鼻

故為分氣之所泄。頤何朗切又去聲頤思朗切

橫骨者神氣所使主發舌者

也

橫骨即喉上之軟骨也下連心肺故為神氣所使上連舌本故主舉發舌機

故人之鼻洞

涕出不收者頤頤不開分氣失也

鼻洞者涕液流泄於鼻也頤頤之竅不開

則清氣不行清氣不行則濁液聚而下出由於分氣之失職也

是故厭小而疾薄則發

氣疾其開闔利其出氣易其厭大而厚則開闔難其氣

出遲故重言也

疾速也重言言語塞滯之謂

人卒然無音者寒氣客

於厭則厭不能發發不能下至其開闔不致故無音

不致

不能也寒氣客於會厭則氣道不利既不能發物而高又不能低抑而下開闔俱有不便故卒然失音

黃

帝曰刺之奈何岐伯曰足之少陰上繫於舌絡於橫骨

終於會厭兩寫其血脉濁氣乃辟

兩寫者兩足俱刺也足少陰之血脉當是

所注之腧穴即太谿也然人有虛勞失音者觀此節之義則亦無非屬乎腎經但其所致有漸與此卒然者不同其治當分補
會厭之脉上絡任脉取之天突其厭乃寫耳辟開也

發也

天突為陰維任脉之會取之能治暴瘡

刺心痛并蟲瘕蛟蛭

四十

厥心痛與背相控善瘕如從後觸其心偃僂者腎心痛

也先取京骨崑崙發鍼不已取然谷

靈樞厥病篇○五藏逆氣上干於心

而為痛者謂之厥心痛下放此控引也善瘕拘急如風也偃僂背曲不伸也足少陰之經由股內後廉貫脊屬腎其直者從腎上貫肝膈入肺中凡疼痛如從脊後觸其心而偃僂者以腎邪干心是為腎心痛也腎與膀胱為表裏故當先取足太陽之京骨崑崙如痛不已仍當取腎經之然谷○控苦貢切偃雍主切僂呂婁二

音厥心痛腹脹胃滿心尤痛甚胃心痛也取之大都太

白

足陽明之經由缺盆下膈屬胃絡脾其支者下循腹裏凡腹脹胃滿而為痛者以胃邪干心是為胃心痛

也胃與脾為表裏故當取厥心痛痛如以錐鍼刺其心足太陰之大都太白二穴

心痛甚者脾心痛也取之然谷太谿

脾之支脉注於心中若脾不能運而

逆氣攻心其痛必甚有如錐刺者是為脾心痛也但然谷太谿皆足少陰之穴取此治脾其義何居蓋濕因寒滯則相挾乘心須泄腎邪當刺此也厥心痛色蒼蒼如死狀終日不得太

息肝心痛也取之行間太衝

蒼蒼肝色也如死狀肝氣逆也終日不得太息肝系

急氣道約而不利也是皆肝邪上逆所謂肝心厥心痛痛也行間太衝皆足厥陰經穴故當取以治之厥心痛

臥若徒居心痛間動作痛益甚色不變肺心痛也取之

魚際太淵

徒空也臥若徒居無倚傍也間或動作則益甚者氣逆不舒畏於動也色不變不在血也

是皆病在氣分故曰肺心痛也魚際太淵皆手太陰經穴故宜取之

真心痛手足清至節

心痛甚旦發夕死夕發旦死

真心痛者邪氣直犯心主也毒深陰甚故手足之清

至節其死之速如此○愚按本篇所言五藏之滯皆為心痛刺治分經理甚明悉至若舍鍼用藥尤宜察此詳義蓋腎心痛者多由停滯故胃腹脹滿脾心痛者多由寒逆胃心痛者多由停滯故胃腹脹滿脾心痛者多由寒逆中焦故其病甚肝心痛者多由木火之鬱病在血分故色蒼蒼如死狀肺心痛者多由上焦不清病在氣分故動作則病益甚若知其氣則順之在血則行之鬱則開之滯則逐之火多實則或散或清之寒多虛則或溫或補之必真心痛者乃不可治否則但得其本則心痛必隨手而應其易如探囊也○清音清寒冷也

不可刺者中有盛聚不可取於胸

中有盛聚謂有形之癥或積或血停聚於

中病在藏而不在經故不可取於胸穴當從內以調治之也

腸中有蟲瘕及蛟蛭皆

不可取以小鍼心腸痛懷作痛腫聚往來上下行痛有

休止腹熱喜渴涎出者是蛟蛭也

此言蟲瘕在腸胃中亦為心腹痛也瘕結

聚也蛟即蛭屬蛭也不可取以小鍼謂其力小不能制也蟲瘕之證其痛則懷懷難忍或肚腹腫起而結聚

於內或往來上下而行無定處或蟲動則痛靜則不痛而有時休止或腹熱喜渴而口涎出者是皆蛟蛭之為

患也○瘕如駕二音蛭音回懷乃包切

以手聚按而堅持之無令得移以

大鍼刺之久持之蟲不動乃出鍼也

此即治蟲瘕蛟蛭之法大鍼第九鍼

也久持之而蟲不動中
其蟲矣故可出鍼也
悉腹懷痛形中上者
重言證之

如此其形自中自上而漸升者即
當以蟲治之也○悉併同音烹

○心痛引腰脊欲嘔取足少陰
靈樞雜病篇
後引腰脊前則欲嘔者

此腎邪工逆也故當
取足少陰經以刺之心痛腹脹嗇嗇然大便不利取足

太陰
嗇嗇滯滯貌此病在脾故當取
心痛引背不得息

刺足少陰不已取手少陽
足少陰之脉貫脊故痛引於
背手少陽之脉布臚中故不

得息宜刺心痛引小腹滿上下無常處便洩難刺足厥
此二經也

陰
足厥陰之脉抵小腹結於陰器凡
心痛但短氣不足
心痛而下引小腹者當刺之也

以息刺手太陰

肺主氣故短氣者當刺手太陰

心痛當九節刺之按已


刺按之立已不已上下求之得之立已

此總言刺心痛之法也九節即

督脉之筋縮穴宜先按之按已而刺刺後復按之其痛當立已如不已則上而手經下而足經求得其故而刺

之則立

已矣



類經卷二十一